

KRING

(A · chikni ja · rikbewal)

Kroshnil D. Sangma

Acc. No. 17799
Class No. 392.5954/66 Book No. 58115
Author Sangma, D. Sangma,
Title Kring (A. Chikri
jail Bawal).

Borrower's

DISTRICT LIBRARY
EAST GARO HILLS DISTRICT
WILLIAM NAGAR

Accession No. _____

1. Books may be retained for a period not exceeding *fifteen days* by members.
2. Books may be renewed on request at the discretion of the Librarian.
3. Dog-earing the pages of a book, marking or writing therein with ink or pencil, tearing or taking out its pages or otherwise damaging it will constitute an injury to a book.
4. *Any such injury to a book is a serious offence; Unless the borrower points out the injury at the time of borrowing the book he shall be required to replace the book or pay its price.*

Help to keep the book fresh and clean



KRING

(A·chikni ja·rikbewal)

Copyright © by Author

Authored & Published by :

Kroshnil D. Sangma

Ku·simkolgre,

P.O. Williamnagar – 704111

East Garo Hills

Dial : 9436113675


Rs. 75/-

KRING

(A · chikni ja · rikbewal)

392.598464
SAN;6

Printed at :-
Eeu Dee Printers
Nakam Bazar, Tura-794001



Aganchengani

Kringni miksongara nokchongni a kimko tange ripingani ong 'a. A chik nokdango nokchong man rikaniara pangnan a kimko ja rika. Beben nokdango demechiksa man rikani niam ong 'oba nokkromna pangnan pachipakni sepangbatgipa an 'chiko baseskara ine nikna man 'gen. Mongsongbate nokkromna demechik deskangko pangnan pagipa an 'tangni gri sokchiko chawari rime an 'tangni palo ja 'chongronga. Uandake chasong chasongna apsan nokchongoniko su 'songrikrike nokdang ripingani ntingkon kring ine minga.

Da 'ororo chasongni kri manderang skia poraia man 'tokaha aro pilak gitan janggi tangani gadangba dintangaha. Uandake jikse baseanio jakgitdel ong 'tokaha. Ke 'gija nanggija bakdong kimade bewal ong 'pilaha, una bate bang 'batan jat gipin ba rorirangkosan basebatengaha. Jensalo A 'chik me 'chik roriko segipa basea unon nokchongni kringkosan ong ja indiba ua jatni kringkoba den 'sotaha. Apsandake A 'chik me 'asarangba rori me 'chikko jikgipa baseahaon jatni kringko den 'sotaha. Jikgipako an 'tangni maharichi chapatode ua jatni dakbewaloni ong 'rongbewal ong 'jaha ineba nikna man 'gen.

Ia kringni bidingko da 'alonaba songadamo dongenggipa manderang raken ja 'rikengkua. Ong 'jaode a 'king gore man 'rikanio nokma gatrikanio neng 'nikani ong 'katrongachim. Maina, jensalo A 'chik nokma gatrikon chengoni ma 'ambini birap gita ma 'gapna nanga unbaksana ma 'ambini a 'kim gita ja 'rikna nangachim. Uni gimin, A 'chik nokdango man 'rikani nokni gamsan ong 'aigya a 'king gore gimikko man 'chapani a 'sel, nokkrom man 'rikanio pangnan kringko sandiesa baserongachim.

A 'chikni ja 'rikbewal kring aro a 'kim maichim haida mitamrang gualpilenggnok ine anga chanchia. Uni gimin, ma 'gitчам pagitchamrang jikse baseani unia nokdang man 'rikani bidingo pangchake, uamangni chengoni maikai kring aro a 'kimko ripingachim, uko gisik ra 'atpilna gita anga ia kan 'dikgipa birapko tarie sena namnikaha.

Ia kringni gimin anga, chonaoni an 'tangni mikgrontangchi nikrikako; songo noko a 'kimni gimin gro 'jeanirangko; a 'kingni nokma man 'rikani maharini ma 'ambioniko, unia gittimtango ong 'anggimin obostarango pangchake tariaha. Iako Matchi-Dual ku 'sik agangipa Daranggre jolni ku 'sik unia bewalo ja 'rike seaha. Uni gimin, badiaba gittimni dakbewal baksa haida apsan ong 'janaba gnang.

Ia ki 'tapo janappgimin manderangni bimingrang, songrangni bimingrang, aro obostarang gimikan angni gisiko chanchiako tarie seanisan ong 'aia. Saniba biming ba obosta apsan ong 'genchimode maibakai ong 'gakesa ong 'aigen.

Uni gimin, ia ki 'tapko jeba poraigen, ian ma 'gitчам pagitchamni ja 'rikbewal niamko gisik ra 'atani ine ra 'pachina mol mola.

Mittela.

Kroshnil D. Sangma
Ku-simkolgre, Williamnagar.

Ning·o

<i>Bichong</i>	<i>Jakra</i>
Aganchengani	iii
1. Rinjang ma·ni noko napa	1-3
2. Jingjeni gimin chanchia	3-5
3. Nomil jinma e·sal aka	6-9
4. Ronang	9-11
5. Jingje ma·ningsa	11-13
6. Ronang simbraenga	14-15
7. Misi sarang kita	16-18
8. Songo jil·jala	18-20
9. Ronang ming Kawak	20-22
10. Ronang ming ma·gipa	22-26
11. Ronang branganga	26-28
12. Ronang brangako ma·sia	28-30
13. Jingjeko dilanga	31-33
14. Noknapea	33-35
15. Chawari sing·a	36-40
16. Chawari sing·taia	40-44
17. A·kim gaa	44-47
18. Sinje re·pilanga	47-48
19. Jalasingko pagipa tata	48-49
20. Songo gro man·a	50-53
21. Panterang esonja	53-54
22. Jingje Jalasingko sikanga	55-57
23. Jingjema Jingjepa knasoa	57-58
24. Mahari sokkrima	58-60
25. Do·sia	61-66

1. Rinjang ma·ni noko napa:

A·dingre dams a·sengbegipa gittim ong·achim. Bring bolgrim jangchi, adita a·timbo chu·kala, manderang a·timboko wilwile nok rike dongachim. Gittimo manderang indita jalbia ong·jachim. Simsang chibimako niondape song roani gimin namen a·sengbeachim. Gittimni sal napramchipak, songko bawensokna gitdik dakpile, chiring chona dilsa·joka gngang ukon manderang chi ringna unia au miksuna jakkalachim.

Bring diltubeao song roani gimin songni samtangtango buring chata aro dingtang dingtang ma·bringrang unia do·orangan gapchipchipaiachim. Pring an·tam marakkani hopani ku·rangan jangchipchipaia, unikoa, pringwalnin do·bipana skang skang do·pa nokma, songsam wa·gopgrimo ka·srok ka·srok sul sale do·jinmako okamaton bate songko an·saoatachim.

Sal a·kong mrimri, salmang gitchak gitchak dakangmitingo :

Jingje : Ama, ama?

Ma·gipa : Maina?

Jingje : El·lak. Awasai, ada he·baenga.

Ma·gipa : Aia, maina adobaengjoksai!

Sreko wa·ding ki·bitjoljole.

Jingjepa : Sawa he·baenga?

Jingjema : Nang·de, Ringjang wai.

Jingjepa : Mai nanggitdikanasa nabaengjok ?

Jingjema : Sanjing. O, Sanjing.

Sanjing : Maina?

Ma·gipa : Ajong, nang ada he·baenga. Incha andal·jokode baoniko. Ra, Jingjeni stike jilgipako, da·on. Inchade maiko samsru enggalna, nang adade.

Jingjepani nokara a·ding niknangraon chiring nokgil ondape rikachim. Adita che·kalaonin manderangni re·baengako aro re·angako nikrikna ma·aiachim.

Aditani ja·manon Rinjang, ma·gipani nokona sokbaha, nokkrenge dokra done unia an·tang jakbitako pakmao pote:

Rinjang : Jingje. Aia, ding·oljokde! Ra, angna chi ra·bacheng, ra.

Jingje : Adana. Srek balwa nangkala. Atchongebona.

Rinjang : Aia, namkalne ho·e. Jingjea nampaengama?

Joljol srekchi re·ange pagipani sambao chadengea, pagipa depanteko nido:

Pagipa : Bi·sadrangde namtokengama, aragonga?

Rinjang : Im. Da·o mangmangde. Mijasa, ma·gipasa, sagitdikachim. Babara, an·sengkalenga?

Pagipa : Alimila. Nampaenga da·ode.

Ma·gipa : Maina he·bagitdika, ajonga? Angsudrang namtokpaengama?

Rinjang : Namtokenga namade.

Jingje : Ada, ha chi.

Rinjang : Ra·ba ra·ba. Gitdok ka·ranan maiko. Ding·aba ding·e alasajok!

Ma·gipa : Jingje. Mija ang wa·tek katipgipako. Ra, nang adana de·bai hon·e. Alimila neng·aniko ipe rosokal. Sanjing! Nang awang Kawakpakoming nang mama Santopako dimdimgalgale agane. Ada he·barana inbo, ne.

Dikdiksa sreko wa·tek ipe paningsa golpo ka·engon:

Jingje : Adara. Alimila, jaksugalechengbo.

Ma·gipa : Maiako ajonga. Samsru mangmangde gnangpaosa, angai.

Rinjang : Okkriaba okkriengjok, ho·e. Babara cha·jok?

Pagipa : Baoni gri. Hai, apsan cha·ainok angaba.

Sanjing : Samsru enggalesa he·batoknena.

Rinjang : Sanjinga, angjonga. Nampaengama? Hai, apsan cha·boda.

Sanjing : Incha cha·aina, ada.

- Pagipa : Angboninga nampaengama. Alimila he·na donade rakpaengma?
- Rinjang : Rakaianga. Gamo rim·oba angnade bataiengkua, budepasongde.
- Ma·gipa : Rakpagipanchimai adade. Da·o gamkaroke bil be·angesa. Gamoba rim·oba bilsi sokdilpajaoba pring an·tam jaksudilgijade dakenjachim. Bochia barakpaenga? Mikkang rimapilengjok.
- Rinjang : Manian saa dinga bang·brejai rakkala gita dakpilenga.
- Pagipa : A·ba gamparade alimila gammiting rim·mitingonade sokpagnema, aragonga?
- Rinjang : Bilsi gipinkode toenja. Bilsi sokjaoba gammiting rim·mitingo okgimu chakdilade chakdiljawa

.....

2. Jingjeni gimin chanchia:

An·tam walsimsim do·o nolo gakrimo, bi·sa tusi ritdik ritdik dakango, Kawakpaming Santopa, nokra nape du·dap sambao chadengea:

- Kawakpa : Aia, depantekoba nikgijan jaromanchajokai. Hai depanteoba salam.
- Rinjang : Awanga nampaengama?
- Kawakpa : Nama ineming maiako! Indakangaengjok nang·pade, ajonga.
- Santopa : Anggria, maina he·bagitdika? Hai, gritangoba salam.
- Rinjang : Amasong appasongko mikkang gronggija jarojok. Unasa knal anti he·jole nappakaiaasa, mama.

Pagipa dringchi napange dikchok dal·kalako de·bai cha·smil se pang du·dapsamo songea:

- Jingjepa : Ra, Simrong. Gipina jawara gri. Na·an, alimila chi gate roatsrang.
- Simrong : Dai! Dede bewaljokai, barakbo gume?

- Jingjepa : Maiako na·aba. Chi gatdapataiboda.
- Santopa : Anggria, maina mancha dobara? Sokrong naronggiyakode name talosa namai, mo?
- Simrong : Ho·e nanggo! Tanggitdikama? Nangchomotama?
- Rinjang : Mai tanggitdikna, mai nangchomotna, mamaba. Angade babako aganjolna inesa. Na·songan agandilna nangaine.
- Kawakpa : Je jakoba, depantean na·an ku·sik ochengosa. Mama adaba, awang appaba, agandapna man·pane. Depantea?
- Rinjang : Atcha, indakoa. Im, mama ada gimikba, awang appa gimikba. Stuna tang·rakjaoba hakna sappajaoba. Ho·e, angan do·gakode ochengainok.
- Santopa : Itdinesa nanggo! Iasa katta chengani bima kolani rama, anggri.

Rinjangni katta chengna ku·sik omitingon:

- Kawakma : Aia, ajong nabaparakon, hai salam.
- Santoma : Anggriko mikkang gual gual dakpiljok, mani salam.
- Santo : Atchai da·asalde, mai sal mosaba! Namengama? Hai salam, mosa.
- Kawakpa : Hai, ajonga, chengangaibo hai.
- Rinjang : Ho·e, nitoako ninama kraako donnama. Inchaba hambinba, ada aganpainja mama nipilanginja ingine. Jingjeara dal·ara kambe sokjok. Babara, an·tang gamrakanggiyako nipilja, an·tang rim·rakanggiyako nipilja. Ambi atchuchi il·engeba mangeba nijawama? Basakona srindamnebai? Unasa da·on apjokkalenga. Gama rim·aba naljokkalenga. Nappakbajolaia, awang.
- Kawakpa : Ong·a depante. Iade ong·chomota, ne. Jikcholko saduko hai indake nipabo inaba na·song dedrangni ku·sikko knachengna nangchomota.
- Santopa : Ho·e anggri. Namaijok. Angara, gumeko abiko agana gitdik gitdik dakoba...pa·sika gita dakaia. Da·on namaijok.

- Jingjema** : Aganpainibo, he·ko nang·pako. Na·song angdedranga, wai. Basakonin angade gepgeppa·engachim. Kamkosa kam pa·sikaia. Im inoan nachil chinapinjajokde, nang·para.
- Rin jang** : Unan ama. Inchade hambinde, ja·mande ja·wilde...ma·bisachi nobisachi il·enge ga·dike nijolenja inainok. Mandeska, songska nokskaba, nioko ha·aija amako talnikja inainok. An·tang kang·karenaba an·tang jakgitdoknaba, ma·ko pako mikkang pa·osa, sandi mangampaosa ong·para uade. Indinde ban a·proniko, mo mama?
- Kawakpa** : Atchai, angkoti. An·ching dedrangde...agana krarako aganengjok mangnengna namsangako mangnengengjokai. Na·songa..angkotisonga.
- Jingjepa** : Im, ho·e. Dedrangba agana krakra aganjok. Sa·drangba ina namchacha inengjok. Mangnenganiba ong·aijok. Angan, pagipaan...an·tang kamko ha·aigija dake chakengajokona.
- Santopa** : Aia, gume. Na·ara. An·tang kni sosiringipa an·chi gipilrmgipa, nokchongan gnganguade, gumeba.
- Jingjepa** : Ho·e. Ma·bisako mikkang pa·na kracha·oba...nobisachi noknapna mikgil sieba. Uchian...attepongko gita, gitchipongko gitaba. Bi·tete am·tete nina, il·lenge nina nangainok.
- Kawakpa** : Na·songa. Jakrara ja·raraba, okgimu ku·gitchueba. Kracha·rimpana mikgil sirimpana. He·an salo aganpabo, angkotisonga?
- Jingjema** : Aia, chawarisongba. Na·songko jakbitpajaoa sako mancha? Sawa gipin gngangpakue? Gitching gngangparama ruet gngangpaaima!
- Kawakma** : Unan abi. Maming maming dakna cholipajaoba...nachil mangmang knatimpana. Mikgron mangmangba nikpana, abi ne?

.....

3. Nomil jinma e-sal aka:

Songni nomil jinma Simsang chisamchiko e-sal akna weangtokengachim. Usong wekwekanan simu gripo suk ong-e tuenggipa makgitchak, jagok jabrange, hopprete katangaha:

- Sinje : Aia...dugara! An·ching wekwekana mikchokpret
chusugipasa. Jabrange hopangengjokai, nipa...
- Mire : Ho·e nanggo! Agri korekdamode naminjai.
- Kimse : Him, sarisongba! Da·o korekpajaoa basakosa na·aba.
- Dore : Badinram·a maniba? Nomil jinma bring he·o a·chang
napo an·seng balkorekjaode mandeska badinok, bring
samring jachanokde, mo sari?
- Sinje : Ho·e Sarisong. An·chingde. Mai ma·gipana kenpilna,
mo?
Simsang dare gam·ana,
Ku·rang name knaja,
Noksam buring dikana,
Mikkang name talrikja, Aiao!
- Dore : Aia...sari. Sako mancha nikrikjajoksai?
Simsang guri dinako
Agal kambara gita,
Niksoaijok sonako
Salni nabara gita, Aiao!
- Kimse : Atchai! Anoba ka·srokpile sapa dakade, mo?
Balwa balsri balana,
Me·ga bijak moenga,
Angko mikgron nijana,
Gose dukko man·enga, Aiao!
- Dore : Abi. Abi. Da grapmangmanga, ne.
Jajong jateng rakana,
Simsang chibal moenga;
Ka·satangko nikjana,
Gose dukko man·enga, Aiao!
- Mire : An·seng balkorekoba...adi gnang na·songa!

- Sinje : Sarisong. Sarisong. Aia, da skimbo. Ia abi Jingjede, ku·sik waring man·jaengjok wai?
- Mire : Na·song mitdoana jinma kitkitpanema?
- Sinje : Dugara! Abi dugara! Nang·koa mai tektaksaenga indakoa?
- Kimse : O, sari Jingjea. Mai jumangko nikenga?
- Jinge : Gri na·a sari. Mai jumang mai u·mang.
- Dore : Mija awangsong he·baonin, saride. Asolan, ku·sikgri waringgri. Mai ong·jokbai?
- Kimse : Maiako agananga, ma sari Sinje?
- Jinge : Ano da agana. Ne, Sinje ne.
- Mire : Ra, ano Sinje. Agansrangeni. Angara knarikinja wai.
- Sinje : Na·aba, abiba. Chokkema dake songo parape·nasa misi sarang kitnasa.
- Mire : Na·achacha na·adingding. Sinjechachara. Maiako aganchonnika dakronga? Angara basako? Maiako? Songna parape·jok, misi sarang kitjok, ha?
- Kimse : Aia, sarisong Mireba. Rekrakanan ka·chi ka·o nangarna?
- Mire : Ka·o nangmanchara sari angade. Pangna pangna angko mande ong·paja inaskana agangitchia dakronga.
- Sinje : Nang·ko mande ong·ja nede chonnikpaenjachim. Abi anga telarasachim. Abi, kema ka·bone.
- Mire : Kemaja damaja! Asol ka·o nanga angade.
- Kimse : Sari kema ka·pabo. Aia, uara telarasade. Ra, sari Sinje. Agansrangbo, na·a.
- Sinje : Ahem. Mamasongni gittimde, adasongni a·songde...awa Darang pattalchi. Sarisongni gittimchi, me·gagongni balimchi, gittim ja·renakana, da·aning!
- Jinge : Dugajok, Sinje! Na·aba basako misi sarang kitna man·gnok inesa timenggipa, mo?

- Mire : Aia, anoba. Nampajok. Kringtang a·kimtang. Sana kira cha·kua?
- Kimse : Ho·e, nanggo sariba! Dai, chingara gipin jawa ong·injachimde. Maina donruna sika, ma sari?
- Dore : Gose sari man·panok, anga bochi inpanok. Chingnade kusinisa, mo abi?
- Jingje : Chonnikaibo na·songba, sarisong manisongba. Angchi ingipade... an·tangnade, ong·angjok.
- Kimse : An·ching me·chik ingipade nang ja·kolkon ga·aine. Indakoba Na·a skang sannangcheng, sari ne?
- Sinje : An·ching chasongrimoni aksaba maidake a·kim gaa maidake cha·che chaka nikkujai nikade.
- Kimse : Rektekai sari. Ha·aiaba ha·aikuja.
- Sinje : Abian skangnagipa. He·angchengbo, abi ne.
- Mire : Aia ano, me·chik ingipade salsade chagrongna nangaine, mo sarisong?
- Kimse : Ho·ejaode maisa? Ma·ni pani ja·kolkon ga·na nangaine, nioni re·dokrako dingdingani, sarini jakrimrako rim·aoni sawa mancha joknasai.
- Dore : Ho·e, angse appa an·gija, nokko dol·lotlot roosa jokaine.
- Sinje : Ma·a paa donpaosa, mama ada watpaosa, sariba.
- Kimse : Sari maina duk ong·biabai?
- Jingje : A·dok gipin chig·gipin. Nio ama badakne, Sari mani badin ne, unara
- Mire : Aia anoba unamangmang?
- Sinje : Ho·e abi. Angna angse appa nanga ine krengna nangneai. Maibadake na·tokko gita na·batko gita jakoniko jokatode, mikkilsai.
- Kimse : Ong·a sari. Nokoni ja·ku de·na skangan, Ba·brako Kalkameko rasong on·pabo ka·sachakpabo inesa chakatna nangnokai.

- Sinje : Aia salijokai! Hai el·laktokbojok. Saoba ku·sik
man·gnok mitam·janggil olgnok asolan.
- Jingje : Angade...sokpileba...mi su·na chi ko·na nang·kune.
Hai, el·lak e·sal siktokbo, tengreng oldingdangtokbo,
hai hai.

.....

4. Ronang:

Sal a·kong mri mri dakangjok. Songni manderang chigachina seksak
seksak dakangtokengachim. Nomilrang mitam chi olna tengreng
tong·ritjang ole re·angtokenga, mitam aue pil·baengjok, aro panterangba
au miksue pil·baengachim. Jingjeba ringra koko ole aujolna jako
gansreaniko gate chigachi re·angengachim:

- Ronang : Jingjeba da·ororode mikgron nijaming ku·sik on·jaming
daka dakaijok. Knarama, Jingje?
- Jingje : (Bik nipile) Makane?
- Ronang : (Gam·brebregija) Gri. Haunama inesa.
- Jingje : (Ta·rake re·joljole) Ho·e.

Ronang gamchako pakkreo gate, jaksa kang·kare rim·e aro jaksa
sko brikjoljole, Jingjeni re·angako mikjappil·gija unia ku·kippil·gija
nirikengachim. Sinjeba chigachina ringra ole skelbaengachim:

- Sinje : Aia, Ronang! Nang ku·sikode do·ka napgnok. Maina
wangenga, awang?
- Ronang : (Rang·san to·tro ong·e) Ha? Na·a angko jagokatade.
Na·aba, Sinjeba.
- Sinje : Maiako wange niskaenga indakoa? Ma abi Jingjeko
chasongnaba nikkuja?
- Ronang : (Sko brikjoljole mikkang gitchak gitchak) Angara
Jingjekosa nipaengakon? Na·ade gro a·menga, Sinje
ne?
- Sinje : Awa he·anggi para abi Jingjejai sawasa? Gro
ham·enggipade na·an.

Ronang : Aia, Sinje na·ara. Angara mosa Kawakkosa nisopaengo...

Ronangde minggipinko pa·sikna chol man·jajok, mikkang gitchak gitchak kratcha·timake, ta·rak ta·rak nokchi doangaha. Sinjeba chiga rong·pattalo bik kokcheng ongale, Jingjeni ja·anchinnik witachi re·ange kur·misichi:

Sinje : Abi, wai abi.

Jingje : (Mikkang natjoljole) Maina anoba. Mikkang natenga.

Sinje : Na·ara Ronangko nikbara?

Jingje : Nikbara, maina?

Sinje : Asolan, nang ki·sang ki·sang wanggrakpile nirika dakenga. Aia do·ka napgnok Ronang inoa, jagokjok bia.

Jingje : Angkoanma sakoanma anoba? (ka·dingsmitsmit dake)

Sinje : Unoara, na·asan aksa he·baskaenga, abiba.

Unomiting Mireba usongni janggilchi bik dake:

Mire : Na·song abisara matchaduma? Maiako pru pru mitdu mitdu?

Jingje : (mikchrao nido) Gri na·a abi. Ano Sinjemingsa...

Mire : (sengnapgija) Ra, angaba knapa·na anosong. Aganpaaini?

Sinje : (nigitchinge) Gri inoa maiakobai abiba.

Sket bakket apjitange, sakgnian janggildite, an·tangtangna ka·dingengachim.

Mire : Sromgope donoba basakobade bretaine anodrang, ne.

Indakmitingo Kawakma, auna gana jang·jange, prau prau batchimbongbaengachim.

Kawakma : Mai sromgopako aganenga, ano ting·geta?

Mire : Gri ma·de. He·a Jingjeming Sinje matchadu anti cha·anasa sing·parachim. Aganja dakaia.

Kawakma : Makanasa unara ding-doskaengana na·ara?

Mire : Salba jaba! Gri ding-inja. Knana sikpaisa ma·deba.

Bisong ma·desa jegrikmitingo, Jingjeming Sinje, ringra oldingdange katangtokaha.

Jingje : Ano na·a indakarangko da ku·sik jo·ramne. Mandeska knaode ku·sik sa·a rognok.

Sinje : Aia abiba. Maiako ineming. Da kenchak.

Unomiting Jingje ma·gipaba auna ta·rak ta·rak ong·onbaengachim.

Jingjema : Jingje, nang·pa okkriengiokna. Ano ja·rakangbo. Anga sko ka·kita amjaengiok, sko ripgalgale katbakuna.

.....

5. Jingje ma·ningsa:

An·tam simsim dakangon balwa sri sri balengachim. Jingje ma·gipa miattam cha·mane sreko asonge nigamengachim. Ja dal·kalbani gimin samtangtangchin bokdimdim sreko niwate balwa chakna an·sengbeachim. Indita sin·aba ong·kuja an·tam balwa ringe rona namchacha:

Jingjema : Ano.

Jingje : Maina ama? Anga du·dap witrokengkua.

Ma·gipa : Matchotode mora ra·bai ra, ang skoko su·tikat. Maidakpile ka·kitasai skoba, angai.

Jingje morao asonge ma·gipani skoko su·tikna a·bachengaha:

Ma·gipa : Anoa. Inchaba hambinba, ama aganpainja, ama skiangpaja ingine. Name nachil tingsronge knatimbo. Nang·pade. . .an·tang jakgitdokna, an·tang kang·karena, ma·chi nochi, kera ningku ole, manggot chale nina am·engiokna. Ano ne.

Jingje : Bachi ma ama?

Ma·gipa : Bachikuna anoba. Galna ekna man·gijagipa nang·pani jetjet kam·kam, nang mani Jalama Darang Pattal songo gnangko nikjama. Chasongnan an·chingde, bisong

nokchongonin...cha·ri srepakuja, janggi cha·srepakuja.
 Da·sinin re·dokra mininian jakrimra, kring kaenga ja·kol
 sannenga. Bisongan a·kim nokgipa, bisongan kring
 nokgipa. Da·ode ang ja·kolko sanani nang·na somai
 sokskajok. Ano ne.

Jingje : Ama angade chonengku·a, gong·kujaengachimmai.

Ma·gipa : Nampajokai na·ade anode! Noko demechik nomil ajak
 ajak sokako dondamode jawa kal·steka, ha·aijok?
 Unode chingasan krat olaijawa jaksi chikaijawa. Mama
 ada gimikni mikgilko palgnokko nikja. Ja·man ja·wilode,
 nioba amaba, kari wa·singko gita palbeka, na·kam
 wa·singko gita botbeka ine sole roainokko nikjama.

Jingje : Ama angara songko nokkoan nikpakuja. Mikkang
 bimangkoan talpakuja. Unasa aganpaengachim.

Ma·gipa : Angade nang·pani mikkangko nikchenge a·kim
 gaparakon? Nang·mabitchi nang·pabudean rimdraange
 noknapjoleaiako nikjama. Angade nang·namaba
 chonkalpaengachim. Indakoba nang mama jinma
 salkrongna am·aia. Una mikchi jakrusite, jako ba·ra
 rim·tome, bandil bandil mama adako ja·rikangpaijok.
 Unikoba bilsigni jrengjreng nang·pana cha·senga.
 Mandeskana koomparaming nang·pa seng·a
 dakparaming. Kai sina am·piljok angade. Indakoba
 nang ambi atchua ramram namparama. Maina niokoba
 sarikoba, mitdakoba nampane jachaiba ropane,
 da·ning.

Jingje : Angade chakna amjaode katbaineai ama.

Ma·gipa : Salba mai! Ano na·ade ho·e! Mikkang skangchiba
 indakram·jokode... brange sina nesa dakaibo. Jawa
 studapako songsal jaksi otakode chake nibo chile nibo.
 Mandeskara atteskara niochi he·a ong·ja denggu
 dakasa, amachi am·chomota ong·ja donmitdapasa ine
 kal·e roaiginok. Chasongna deritchuna dejamanna,
 ja·guna ja·ripena, amikani ma·kringde askini
 nokchongde, mini gita mija gita, jawako donmitdape

gipinko sebring nike re-denggua dodenggua ine
 aganchainok. Da dak anone. Srikba mittinba
 chanchiram·nambe. Jumangba niknambe. Da·o
 mangmangde songsal jaksi ota grikua,arang studapa
 grikua. Ada ku·sik olkuja, mama jakpa de·kuja. Nio
 agana cholgrikua, ama intekna rama man·kuja.
 Cholgrioba choldakjaoba, on·e cha·na man·jaengoba
 sai on·a grioba, mandeska atteska mande mingpaenga,
 sa·ra ropaenga. Noska mitdakema abitang jachaima,
 songska nokska solema. Chengoni, atchu ambini,
 ja·kolko ga·ai niam bidingko name ja·rikna skirikbo ano
 ne.

Jingje : Indakoa, chakna inming chakaibo, sengna inming
 sengaibo?

Ma·gipa : Nang·koara aksa galpanema. Gisep gipude, sa·ra roa
 gita gittim bata gita, chinga nirokgnede. Nang ada
 mamaba nipil nichapanede anoba. Gitching ba·gipa
 gnangpa·aima ruet kegipa gnanguema. Na·an saks
 kamkam. Barake aksa ge·sa galchippagnok. Nang sari
 jinmaba – Sanejinga. Mirajinga. Nang·na
 simchakpanede. Gipin gita jawa gita dakinja
 nang·paning ba·rimade. Mini angni nang·pana rotimoba
 nang mani Jalaman, angko watgija rim·kepkepaiai
 da·ning! Da·oba nang·ko mikkang nikoan ka·satokaine.
 Ano, tol·anode niaibo.

Jingje mikchi se·ep se·ep, srek jatengao nigame, ma·gipani skia
 pattiako knatimaha. Gisikode an·tangni mikkangchi ja·ku de·gnini gimin
 chanchichame namen jajrengengachim.

.....

6. Ronang simbraenga:

Robibar sal. Songni nomil pante jinma Simsang chisamo chekchak bekbak autokengachim. Bi·sarang chisam wari nekkalao matram na·tok kal·enga. Panterang dare on·susatokenga. Chisam in·cheng dingatgipachipakde nomilrang – mitam do·ka ring choe, mitam baling gitdoe, mitamrang chiting doke an·sengtokengachim. Simsang chikol bekpbolpilengachim. Ronang saksan dare ku·mang balwa srisri nangao, rong·pattal sako asong dandarengae, jakko sing·kam nale, rong·te doktekteke roengachim. Kawak chioni gadoe nigamato Ronang saksan roengako nikataha:

Kawak : Mosa, wai mosa? Aksan mai jumangko nikenga?

Bewal okamakode dare gam·anan Ronang knajaengachim.

Kawak : Aia mosa! Bachian cha·branganjok?

Ronang de·dogala gita jagipue:

Ronang : Che, Mosaba! Angko jagokata. Brrruai!

Kawak : Da·sinin okamenga. Bachi cha·rama?

Ronang : Cha·ramja chikramja. Dare gam·anasa knasopajaengo.
Balwa sri sri an·senga mosa.

Kawak : Balwa nangenga, hi·ing! Nang mikkangan aganenga.

Ronang : Gri mosa. Bebe. Balwa nange suk ong·anasa roenga.

Kawak : Chomot chong·ka. Chasongna balwa chakrongengaba.
Da sromgop mosa. Pang·sange agangalsrang.

Santo : Maiako dare ku·mango mela do·kruenga?

Ronang : Gri na·a. Balwa ringengasa.

Santo : Nikenga. Dare ku·mango balwa ringjaoa wa·ltim chakpanema.

Kawak : Angaba ukon inparachim. Mosade, mai sadoasikoan man·jokbai, chh...!

Santo : Chh...! Chh...! Aksa rogalgipade...ihing, nambiade ong·injai.

Ronang : Na·a jonggipa mangmangba?

Santo : Unan adatang. Jonggipasa samna bolna inoba rikpa chaparade. Ha·aiakonba?

Ronang : Dit sala. Na·songa dongdangsa. Hai nokchi he·ainok.
Kawak : Nokchijao ban bringchisa, hahaha.....

Ronangni gisiko maiba ning·tubea chanchiani aro man·dikaniko man·engachim. Indiba ua an·tang ripengtangna mamingkon parakna man·jaengachim.

An·tamoba nokpanteona Ronangan skang sokangachim. Jensalo Kawak sokbara pil·e Ronangko kajia bottaiaha:

Kawak : Da·si dareo wal·tim chakani golpoan matchotkuja. Hai gisik pang·sangpile, mosa?

Ronang : Maina mancha angkoa nidika na·songa, ha mosa?

Kawak : Ihing. Na·ade u·mang dakenga mosa.

Ronang : Maiako? Mai sromako engbo angara...maming griko?

Kawak : Griode ra, nama. Basakoba prakosai? Im, aganpaja innama songo roja channama.

Andal mitdik biaptipo Ronang ming Kawak jegrikmitingo Santo sokbataiaha:

Santo : Na·song mosasara chusubebejokma sromgopengama?

Kawak : Sromsako enggija maiko sromdapna , mosaba.

Santo : Haidarok mairok, badi dake dakarok? Na·songtangtangjal·ik gittang.

Ronang : Na·songchacha na·songdingdinga, angkoa maina miksi miktat? Ka·a ding·dobaengjokai angade.

Kawak : Ding·bebejokma mosa, ra rim·e nistrangna.

Ronang : Dit sala! Na·song mande ong·nan chel·ade.

Santo : Indakoa chingara maisa, ada?

Ronang : Santo, na·a bang·e wakrekdamnambe...angade angajawane, inchade.

Kawak : Jripbo, changkolna bate giildodoengjok. Dugaode, kamkrongine.

.....

7. Misi sarang kita:

Agri ja·jodamode banoba ja·gitdotani ong·aia, duga sa·ra roode golpode man·aia; jinma jarodugai wekode sakoba mitdakaona sokaia, unikoa sakgni sakgittamni nachilo balnapako parape·ode katta dokbadaldapaiachim. Mire ganna gisim pittaksrusu webokako ja·skuna garime gane, ki·sang ting·get ting·get, sokme jipak jipak, kodelsi kogaksi, Kawakmani nokchi re·baengachim; Kawakma nokkra balimo mi su·engachim:

- Mire : Aia, da·ning ma·dede! Anosonga bachitoka?
- Kawakma : E·sal akna he·anga wai. Da·onaba sokbara dakkuja. Na·ara bachinasa sokme galwingwangenga?
- Mire : Aia ma·deba badinram·ani jatbai! Angade noko kam matchotesa robaenga. Ra·ba, ma·de, anga cha·samsa cha·samsa.
- Kawakma : Itdingipakoan ham·paengachim anoba. Inja cha·samsa ong·ainokchim. Ra, gong·paode. Anga iko ki·roksatgalna. Ruanba jakkaldimdimcan ma·reinjajok.
- Mire : Jingjekoa Darang Pattalchi he·dilannga ham·enganama ma·de?
- Kawakma : Ho·ena. Mija adatang he·barade. Indakean pagipako basakona Jingjeko nomiljildamenga ine mangnenganga. Ong·ara ong·a da·ning.
- Mire : Gong·paosagineai uara.
- Kawakma : Barake gong·janok da·ning! Chasongnan bisongde a·kimtang. Gong·jaiba bachi jokna.
- Mire : Na·aba ma·deba. Nikpajaisa itdinenga. Asolan he·a Ronanga, Jingjeko ja·rikdingdingan kakketangjok wai.
- Kawakma : (Ruanko jakwate) Amai! Anoba tol·an tol·e rojokma bean bebejokma? He·ade. Ronangde, gro am·engasa!
- Mire : Angade unan ma·de, aganoba tol·a gita bebeoba aganjota gita. Nang·na mangmangsa ma·de ne. Gual gualba ku·sik jokpanambe.

Kawakma : Salba anoba! Namparako inema. Incha amika agana inode chasongna jaksi chikgneko nikjama.

Mire : Aia kimaijokde itjara. He·ainok ma·de ne. Haugalgalkuna.

An·tam simsim dakango rama ja·ku simango, Kawakma gokjru gokjru sa·ra rona ong·katangaha. Bi·sarang gimikan sa·ra roangtoka, noko Santoma saksan, du·dapo dimbil bijak dol·engachim:

Kawakma : Aia manitanga aksanma?

Santoma : Maiako manitangba. Cha·spaming apsan apsan ja·joangtokaia. Aganoba gitchipila, pt...!

Kawakma : Sako badinpilna nanggo! Aganoba an·tangkosa ku·dongjringa gita nikpilaia. Indakean gong·pilja.

Santoma : Robaiasama manitanga? Ha, gong·ode, iko dimbil dol·e ro. Toasa tobreja maiko.

Kawakma : Gri manitangba. Sa·ra ong·katgijan jarojok nesa napaia. Nang ta·makkuan similkala da·ning! Na·ara knapaengama manitanga?

Santoma : Maiakobai? Angade baoni. Nokonian ong·katrampanan jokchipjaian a·gilsakkoan mileng mikgot manitangba.

Kawakma : Aia angaba bachi ong·katpaimingchim. Da·si he·a chokkema. Bachinin dil·gap dil·gap, angchi he·anggalgale aganwatanga wai. Tol·anma bebema, chh....!

Santoma : Maiako manitangba?

Kawakma : Ho·e na·a. Aganaba namja, aganjanaba ke·ja daka. Man·dik man·si kangdik kangsi. Bebe gitaba nang·nara maiko wia dakna mo?

Santoma : Maiakosa knaiming, manitangba itdinram·abai!

Kawakma : Mire agana wai manitang. He·a Ronanga...Jingjeko chi ko·achiba e·sal akachiba ja·rikdingdingangana. Angade nawang chapaijok.

Santoma : Salba...mai! Angade indakram·jawakon nesa. He·a Ronang achak bipade...im, gro ham·enga, he·ade.

Kawakma : An·tangna knai donpaibo manitanga ne.

Santoma : Bebegitaba...manitangba. Namaparako inema,
an·tangan jaksi chikchakani ong·aia uara.

Dore : Aia maniba da·attamde sokbara dakparakon?

Kawakma : Ho·e mani. Ia nang·mani ta·makkuko remsa remgalgalna
he·bara. Malamainok manitanga.

Dore : Mai ong·ana ama?

Santoma : Maiako dongdang? Chubojok. Pringo nang·pana
a·chalatna chuchipgne. Knarama?

.....

8. Songo jil·jala:

Songna parape·angjok, misi sarang kitangjok; songma songkitikona
racha du·dapsikona katta sa·ra roangjok; ku·sikoni jokgimin balwako
ra·pilna man·jaha, katta giproroange agal gita kamangaha. Jingje saksa
sreko mi rame uko do·ona nitimengachim. Unomiting Sinje, kni maming
chitgija, bil·si bil·dak dake sokbaha:

Jingje : Aia, Sinje. Barake kore gita goncho gita?
Knimangmangkode name chitsroke tom·pa na·ara wai.

Sinje : Na·aba abiba. Da·si a·jrichi he·anggalgalani indakaijok.
Sana balkorekpana kni chite ronasai.

Jingje : Balkorekesama...Makanasa ado bakdo indakoa?

Sinje : Abi, abi. Angade nang·na nangchomotako agana
nanganasa adobara. Da·on mandeska grikala.

Jingje : Maikosa oksuang ka·suang anoba?

Sinje : Aia abi...he·a Mire kotchol bimade, matcha skoka
sagide. Misi sarang kitmanjokna.

Jingje : Aia, maikosai?

Sinje : Na·a angna kakketko aganbone, abi ne. Angna
tol·nambene

- Jingje : Salba jaba gnang, ano. Anga basako nang-na tol-eng'a?
- Sinje : Unan abi. Nang-na Ronang...ja-rikrikenga ine tol-gitchiengana. He-a kotchol bimade, abi.
- Jingje : Amai! Dugajok. Tol-oba namkalako tol-paosa, kal-oba kraako kal-paosachim, angai!

Jingje dikdiksana jari dakpile mikgron mikchi sra sra joke, maming ku-sa agangija jadip changaiaha.

- Sinje : Abi, abi. Na-a mai ong-jok?
- Jingje : Agrijok...ne...Mire, na-ade! Ama appa knajokode, ada mama kobol man-ode, angade...indinba sigiminjok!
- Sinje : Da indakpile chanchia, abi. Na-a kakketko aganbo. Basakoba Ronangming gitchingo rueto agangrika gnangma? Bachiba aksan ge-sano he-rimarang gnangma?
- Jingje : Na-ara angko bebera-jama? Basakoba anga nokoni aksan ong-katako nikparama? Jechi jachi he-o dooba ma-ming pamingsa. Anti a-kang he-paoba nang-mingsade. Dugajok! Kambeoni niongipa nikongipanaba kenpabochimai biara.

Pil-sa mikkangtangko rim-tipe Jingje graptaiaha.

- Sinje : Abi na-a...incha saoba sajaba nikode. Badinnok an-chingkode. Bate chanchichipnokai jawade. An-tangko ka-sinatbo, abine.
- Jingje : Him! Angna ong-ja, binasa.
- Sinje : Ma-jong pajongna knaatgija barake wina man-gne una chanchina nanggnok.
- Jingje : O anoba! Bebegitaba basakoba balwako okampilna man-parama?
- Sinje : Ho-e abi. okampilnade man-nikja. Indakoba...balcholko mittunade man-nede.
- Jingje : Basik cholko mittukuna angai!

Usongni abisa jako rim-ketgrike grapjoljole agangrikmitingo Kimseba sket bakket kokcheng ole katbaengachim.

- Kimse : Dai! Sarisonga mi ramtokengama? Angaba dobana man·panemasai?
- Sinje : Aiao, Sari, hai he·babo. Bang·ja atchongekubo.
- Kimse : Aiao sariba, maina mikchi ong·kinamenga!
- Jingje : Maiako agankuna sarisongba. Dugajokai, Mire angko kal·gitchie roana.
- Sinje : Do·reng gakasiakoan abiko molmena man·jaengjok, sari.
- Kimse : Da rasi ra·kama sariba. Bika a·dram be·kunam sinti do·pilgimkunam. Malamgipa do·kime ruragipa susime, namangainede uara.
- Sinje : Ho·ejaode abiba. Mikchi jakrusitbo, hai ka·dingchimitbo, mo abia.
- Kimse : Da rasi ra·bone sarisong. A·gimikan ha·aia, songgimikan talpara. Ku·sik rodikanasa ku·sik jo·e roenga. Una makanasa kenpila sariba?
- Jingje : Kenpilade ong·painjachim sariba. Incha katta jalangjokode ku·sik badiangode mikgil kiracha·gne nomil rasong be·gne unasa.

.....

9. Ronang ming Kawak:

Ronangni gimin jil·jalaniko darangba donnuna man·jaha. Gittimni manderangni gisepo inditan an·tangtangnade jikjak jikjak inaiiahachim; indiba darangba paraksrange jaksi otna kragipa sakkiko man·jaha, Jingjeni mikkangchi re·gnini gimin nisoe chakchiktokaiha, aro amadipat kattako namjripatna pilakan jotton ka·engachim.

- Kawak : Mosa ! O, Ronang !
- Ronang : Maina?
- Kawak : Hai Simsangchi. Na·ara kamgrikonde, mo?
- Ronang : Gri gride. Aratenganesai.

Kawak : Prap gongdapo na·tok cha·suengana wai. Mijal Santo dopade, koksi gappile man·batoka. Hai an·chingba.

Ronang : Hai indakoa. Namkalgine bebe.

Simsang chisam chibawil daka gnangchim; prap pangma gongdapa, ukon chisam prap gongdap wari makkra ki·dap mingachim. Uno makkra ki·dapakon na·tokrang cha·rongachim. Usongba te·abeng cheksi pe·chimbake, rong·pakni jong·pro jinmako doksrape, rong·pattalo asonge ua warion milsi puaha. Rong·pak sambao chisam in·cheng dingata bokdimdim nikpilachim; chisam rikam rikam te·abenga unia matchadu narang dimrim dimrim chatoka, unia chisam chisam kasi bibal boksogimgim an·sengbeachim.

Kawak : Mosa.

Ronang : Im.

Kawak : Na·ara gisik sawawama, anga mingsa sing·na, ne?

Ronang : Dai, mosaba. Nang·ko gisik sana?.

Kawak : Da·ora songo noko jikjak jikjak. An·chingara bak gando ganchengani sa·ra dimu kal·chengani ripeng ong·e dal·rima. Mosa, angade man·dikade?

Ronang : Ho·e, Mosa. Bolgita wa·gita chasong chasongrimgipa. Anga bachi gualna. Na·aba gualjawakonde, mo?

Kawak : Unan, Mosa. An·chingde ba·rima sokchara gita dakpilaijok. Jekoba wigija mik kang para dakoan namkalne. Mo?

Ronang : Mosa, bebegitaba anga... nangna maiko wina. Mamingkon wijawa. Nang·na tale roke aganna, ne? Tol·oba nampagnema Jingjede maming gri. Mosa, angasa bimang dakanangana nomil silbiana... gisiktango ka·dange mikchaia. Da·odipat angoba namgijade gri mosa. Nomil pante inesa paltang namnikesa roaia.

Kawak : Mire achak bima! Namemaba sijanagipa! Uchi jo·jep jo·jep, uchi dil·gap dil·dap. Songo agal so·e roenga. Mijani sing·e ronaba mikkrataia, Mosa. Kema kapaibo.

Ronang : Angara da·ora mai dakbo, Mosa?

Kawak : Mosa, angade maiko inpakuna. Na·aba ma·sia. Noa namchik ong·oba ma·de ma·jong ba·gipasa. Gimikna bate, kring gnang a·kim gnang. Uasa namjabata. Na·a chanchie nibo, mosa.

Ronang : Angan...chanchigija ku·wangjok, ranggol chroktimangjok!

Kawak : Ho·e. Nang·gita chasongska ripengskako mosa bon-ing man·panade sikade sikparachim.

Ronang : Mai dakbo gose! Angan...a·ograng chiograng, a·mikbrang chanchirama.

Ronang ja·skutangko gokgoke grapaha. Kawak namen ka·sachakaha. Mosatangni pakkreo doktope molmena jotton ka·beaha:

Kawak : Na·a ka·a be·nambe. An·chingni mikkangchi janggi tangni mamingan ong·kuja. Mc·asa gita chanchibo, Mosa.

Rang·san mikchi jakrusite Kawakko nitate:

Ronang : Ong·a, Mosa. Indakoba ka·ko kamgiminkoa...mai dakbo?

.....

10. Ronang ming ma·gipa:

Uchiniba Santo ma·gipaba, Kawakmani kattako bobite, Ronangmako grongna re·angaha. Nokona soksrapgijan nokkrenge rim·dingdinge:

Santoma : Abi! Abia bachi?

Ronang ma·gipa nokningo mi song·engachim indaken bewal okamakode knaringachim:

Santoma : Abiara bachisabai?

Ronangma : Sawa maina? Inja angade! Mi wekenga, napbabo!

Nokningchi napange du·dapsik nageng nangnango am·poko jol atchonge:

- Santoma : Anosonga bachiesa an·tang song·enga?
- Ronangma : Aganpa·engbo. A·jrichiko jal·ik stu baring dambe am·ramchina itatparachim. Ritchong nama namako a·bol pitjolbapa inoa da·onan nabara dakuja. Salichipainok asolan. Na·ara bachinisa?
- Santoma : Nang·chin he·baengai, Abi.
- Ronangma : Mai ma·gipanabai, Anoba.
- Santoma : Aganpa·engbo na·aba abiba. Songa noka jikjak jikjak asolan. Ajong Ronangkode!
- Ronangma : Ima makana? Badi dake kal·jok he·a bi·sara?
- Santoma : Na·aba, abiba. Ronangde Jingjeko a·kim sekna am·engjok ine, he·a chokkemani kam...songgimik, ku·sik jo·engjokko!
- Ronangma : Amaba·ai! Anoba bean bebejokma, tol·ean agankinamjokma?
- Santoma : Salba jaba, Abi! Mai ma·gipana tol·e algnok, angara. Kawakmani ku·sikonikosa knapara, Abiba. Maina tol·kinamnoksai?
- Ronangma : Magina jasku oko kekiname, sok kankiname, mittangaingnok dekoba! Chasong dudong, ambi atchu dakgijako...dakeming gro am·engjok. Dugajokai ia bi·sade, him angai!

Miattam cha·ap sokon Ronangba gansre chinsre noksreko asonge ngameaha. Pagipade me·apa jinmaming rona ong·katangachim.

Ma·gipa : Ronang, Ajong, he·bacheng.

Ku·sik miksik on·gija Ronangba napbai:

- Ronang : Maina?
- Ma·gipa : Injo atchong.
- Ronang : Dit sala! Kamgri damgri. Okming okkripa·engo.
- Ma·gipa : Ba! Na·a sok kane dal·atgipa ma·gipako? Angko? Dit sala inpila daka? Dal·jokde mo, appade, na·ade!

- Ronang : Maina indakoa? Aganskaboda.
- Ma·gipa : Angde, na·a maiko dake aljok? Ang nachilo mai nama katta napjoksai? Angara nang·koara indakchinasa, ja·pingtangko dogong chane, jaksitangko ki·gol pe·e, sok kane mittangkinamama?
- Ronang : Aia, Ama, angara maidaka? Buchugri budapgri angko intingtingaioa ong·panema?
- Ma·gipa : O! Buchu budapgri, mo? Maikosa indakaoa songgimik nokgimik jikjakenga?
- Ronang : Na·aba, Amaba. Jawa ku·sik rotojai mitdakramengako.
- Ma·gipa : Basakoba ja·panggri ja·dilgri mandeskako mitdakama? Kamgri a·selgride mandeko ramram mitdakjane. Nang·o maiba mandeskana nitogija ninanggijani gnangkonne.
- Ronang : Im, na·aba indake sakgipinni ku·sikkoan ja·rikaibo.
- Ma·gipa : Nibo, angde! Chasong atchu abimini, bak injo songdong a·chajok inaonin, songsal studapkuja darang jaksi otkuja. Mama grioba ada gripa·oba, Jingjepako mama chane, Jingjemakon mani man·e, chotchangan weng·wangan salo, mirong jakkesanaba gimu tom·sanaba, gamnap sunape janggi tangpaenga. Da·o na·a ong·ai ong·jai dakode, chasongna nang·ma nang·pa, nang·jong nang·no gimiknan songo mikgron nichaoe rama he·na mai mikgilchi pa·pakuna. Amikani depantena, askini ba·gipana, nipa...jawa jikko chai do·sik balaia, a·kim gipinko seke kuri sonaia, mandeska kal·e roaignok, Angde ne. Da·on somai nampitchi, pari jalkujapitchi. Ajong na·a gelbo. Do·ma na·a gualbo. Appa na·a songko wate nang ma·desongchi he·angbone, Do·mane.
- Nogipa : Aia, amaba! Barakesa rongkit miksik chogija bima ma·talsrapgija. Adakoa, amak gita aktete ranggol gita jipake galna am·engjokai?

Ma·gipa : Na·a maiko ha·aipara. Da·suwalni bi·samangmang.
A·kim seka ingipara nampitchima? Janggi jama
chon·aona soka. Bobil ginal dingaona soka. Anga,
nang·ma, nike ha·aimangimin, nie talbagimin.

Nogipa adatangna bilongen ka·sachim, indaken ma·gipani watatana
namen duk man·bee mikkang pingripe grap manggasiaha. Ronang
ma·gipana ku·saba aganchakjaha, du·dapo gokgoke cha·banda
su·tekteke knatimaiachim. Unon ma·gipa an·tangba sinti
ma·ringjolengachim.

Ma·gipa: Angdea, nachil chinapengama? Gisiktango
chanchiengama? Knapring walgnangan nang ma·dechi he·angbone.
Nang·na rasong on·paoa, Ba·rikgipa Rodilgipa nang·na ka·sapaoa,
mikkang mangmangkode nikna man·pakune. Brangoba sritoba,
okkrioba cha·sioba, jawa studapako man·nam, darang jaksi otako
chaknam. Name miksele janggi tangpabo, Do·ma ne. Nang·pa knajokde
nang·ko watjajoka, kasongchoke doksemseminok! Anga ja·mano gisik
ka·timo jekoba nang·pana aganchakainok, Angde ne.

Ronang : Ama, angko kema ka·bo. Anga darangkoba angni gimin,
kratcha·atjawa, jaksi chikatjawa. Da·on anga jechiba brangangaine.

Nogipa : Ada na·a, ada. Walo bachi? Brangoba gitchooba pring
seng·osa ja·ku de·bo, Ada ne!

Ian ma·ni ka·saani,
Chasong gisik ra·ani,
Bewal chasong chasongni,
Ra·bo mirong rongjanggi!
O, Ang Dede Rachara,
O, Ang Do·ma Rangsia...
Neng·o ja·ko neng·takbo,
Nang gangpongko dim·dite,
Okkrio chiko ringsikbo
Ia rongjanggiko cha·sike.
Da nipilang angko,

Ka·saoba jong noko,
Appa na·a re·angbo,
Do·ma na·a bilangbo!
O, Ang Dede Rachara,
O, Ang Do·ma Rangsia...
Ian ma·ni ka·saani,
Chasong gisik ra·ani,
Ra·bo mirong rongjanggi!
Ra·bo mirong rongjanggi!

.....

11. Ronang branganga:

Ronang an·tamon an·tangni gansre chinsreaniko tari tasie donaiaha. Ripeng nangrimgipa mosatang Kawaknaba an·tangni ja·ku de·na miksongako janapjaha. Nokpanteoba ua pangna dakrongbewal gita, an·tangni rongjrigipa dukko donnue, nampinike mesokaiachim.

Pringwalgnang, darang marang mikrakna skang, Ronang sruk sruk chakatangaha. Nokchi dokra ra·na napangoa nogipa waltongsaonin mi bijak song·e tariatahachim. Pagipa mikrakna kene mikchi chotchot adatangni dokrao mipal sike on·nataha.

Walni guri mitmat mitmato, mikgrono mikchi se·ep se·ep, nogipako doktoptope donange, Ronang dokra paksikee andalao gimangaha.

Da·ning! Nogipa adatangna ka·pake, rake grapsrangna pagipana kenenba, mandini sone chokchokramo chadenge, mikchi rue rue adatangko nirikaiaha.

Simsang guri mitmat mitmat, chikol gimik biba dimba dimba, agal kamani wal·ku gita chadoengachim. Ronang an·tangtang auram dare ku·mango miksugale nalsachi batangaha. Chisam prap gongdap wari makkra ki·dapni rong·pattalko nikon Kawakko gisik ra·aha. Dikdiksa asonge ua grapaha.

Simsang chikoloni a·ding chu·ako doangna nangachim. Gindam sippeahaoa ua songtangko nikamataha. Pringni wal·ku gongdingding nokantini kosako gongengako nikaton uni gisiko bate ka·pakaha.

Ding·olchi ran·a ran·kujana kingking, ramasam rong·ma sako ku·dimbikko jaksku sing·kam nale, mikgron mikchi sre sre joke, chasongnaba niktaijawaha ingipa gita, gisik nangbee ua songtangko nikamatengachim.

Uchi nokpanteo Ronangko nikjai Kawak ming Santo jajrengtokengachim:

Santo : Mosa Kawak, Ada Ronangde basakgalgal a·chalangabai?

Kawak : Maina walgnang chakatangna nanga biara!

Kawakni kni chachura rang·san balwa srik nange jajrengani napaha. Ua salgipino chisamo salgimik mosasa agangrikako gisik ra·ataha. Kawak rang·san chanchichipe duk man·beaha aro biaptango nappile tuaa.

Iachi Ronangba, da·ning, ding·olchi tipenba, pil·sa rechakattaina dokra paksikeaha. Sal a·bri kosako mikjret mikjret nangbaaha. Samtangtango do·orang bilgimgime, chitchat chitchat, ka·srok ka·srok mikoatna a·bachengaha. Unosa Ronang ka·suang oksuang songna bate ka·pakengachim.

Indita an·senggipa songko maikai watkinapginok? Ronang wetsa asongtai, songtangko nigame, gokgoke duk man·taiaha.

Songni kosako pringni sal onchakaha. Pilakchikon rongtalbate nikataha. Songni samtangtango chagipa bolrang aro a·brirangko ga·subate nikataha. Ronangni mikgronni mikchi bate bate jokaha. Dikdiksana an·tangkon gualpilaha.

Miksru gingsru songtangna ka·pake nigamengon, bik uni nachilo ma·gipa aganenga gita gisikchi knaaha aro ma·gipani skiako gisik ra·aha; mikchi jakrusite dokra paksikee Ronang mikkangchi ja·ku de·angaha.

Aiao nanggo Ronanga,
Pante namen chananga,
De·jok ja·ku brangna,
Ma·ko pako watangna!
Ka·pak ka·pak atchiram,
Gose an·tang songdongram;
Miko mikchi jingjangsa,

Ka·a suang suangsa!
 Simsang dare balsria,
 Rona namen an·saoa;
 Gisik ra·gen chasongna,
 Aiao atchiramna songna!
 Ka·pak ka·pak nang·nasa,
 Wata chiga grapesa;
 Naba ka·saan ka·tongna,
 Man·ja nang·kon gualna!
 O, ang ka·tongo,
 Gualgen nang·ko basako?
 Ua aman songko,
 Chasongrim ang ripengko?
 Simchak ka·saan jagringa,
 Simdap angna arama;
 Ga·na ja·ku mikkangna,
 De·na ja·ku brangna!
 Aiao nanggo Ronanga,
 Pante namen chananga!

.....

12. Ronangni brangako ma·sia:

Sal onchok onchok dakango Jingje chigachi chi ko·na kok ole re·angengachim. Chigao darangba grichim, ki·sang ki·sang, Sinje ringra koko ole dimdimbaengachim:

- Sinje : Abi, Abi! Da·meku, angkoba sengku!
 Jingje : Maina oksuang ka·suang dimdimjoljol okamenga?
 Sinje : Abi namjajok! Ronangde brangangjokna, da·ning!
 Jingje : Basako maina katangjokna?
 Sinje : Sario sing·oara, minipringna. Manisa kenchake rikbrangatana.
 Jingje : Him gose da·aning!
 Jawa ku·sik jo·ana
 Misi sarang kitana,

Dosi gri Ronangsa
Amak gita katbrangna,
Do-ka gita bilbrangna,
Nangjok gose biasa!

Sinje : Abi, maiko dakkuna...maming gro gri a-sel gri da-ning,
Ronangsa!

Jingje : Indakpile dal-gne inede chanchiparan grichim. Mani sari
gimikba, angni a-sel inesa gisik sachipchipainok.

Sinje : Ong·ja, Abi. Nang·na ka·saisa maniba, haida indake
dakpaengarok.

Jingje : Ho! Angan rasong grima? Ong·jaode angni a-sel maina
jawa branga?

Bisong abisa sintimitingo Mire ting·get ting·get, sokme jipak jipak
wate, kokcheng ole chigachi ong·onbaengachim:

Sinje : Nibo sikkal bimako...an·chingko nikatana
chabaengako.

Jingje : Ano ku·sik raknambe. Jrim knatimaibo.

Mire : Ano Jingjea kobol man·pajok?

Jingje : Maiako, Abiba. Bachi sa·ra roeming bachi gittim
bateming?

Mire : Ronangde, da-ning, bachiba katbrangangjokna!

Jingje : Aia, mainasai, Abiba?

Mire : Sa ha·aipai, Anoba. Mandeska jikjakakosa knapaia,
angaba.

Sinje : Bebegitaba Abia Jingjea, mai nangana? Maiko
cha·rokna Ronangkoa kobol ra·panok?

Mire : He·a Sinje chachara indinchachai agangitchigala daka
wai. Songo roqipakoa a·ko cha·gipakoa chikrokna
cha·roknasa kobol ra·ama?

Sinje : Indakoa na·ara...mai randokdok nangbia
gita...aganjotskaengjok?

Mire : Salba jaba! Anga aganjotengama? Grongesa noska
abitanganasa golpoengoa.

Sinje : Salba nipiljawa jaba nikpiljawa...

Jingje : Aia, mo Na·songba! Jawa bilbrangana gipin
katbrangana, maina gesepa·enga, angai.

Mire bang·e jegrikna chol ong·jai gong·rak gong·rak chi ole
katangaha, bisong abisa duk man·oba Mireko nirike ka·dingnapaha.

Miattam cha·krimano, Jingjema Jingjepa, sim·paktipo an·tangtangni
chawarina re·gnini gimin golpo ka·tongengachim:

Jingjepa : Wai Nang·ma! Nang·ma!

Jingjepa : Mainabai?

Jingjepa : Na·ara chusuengama? Mikgilakengama?

Jingjema : Mikgilakpaenga, Nang·paba. Maina?

Jingjepa : Angade chusujokma nesa.

Jingjema : Mainachim, Nang·pa? Nang anti he·angra barakpajok?

Jingjepa : Ukon agana am·engachim. Na·ara, nang·denara agane
skie on·pajokma?

Jingjema : Maiako?

Jingjepa : Na·aba! An·ching mangsongakoa.

Jingjema : Im. An·tang sapparakode ade aganjok sikde
skijokchim.

Jingjepa : Songchide kobol on·natsojok. Nang·dedrangba
he·pakbainokna.

Jingjema : Ma ajongkoba gronga?

Jingjepa : Ho·e, anti cha·tokengade. Ma·ni noni, pa gachini,
jongska adatangni mikkangko angko jaksi
chikatnambene, Nang·maba.

.....

13. Jingjeko dilanga:

Sal pe·gitdilna skang skang, Rinjang jikgipako rimbite, A·dinggre songona dobaengachim. Iachiba Kawakma Kawakpa, indakeming Santopa Santoma, Jingjepani sa·rao tom·soaha. Jingjede mikchi se·ep se·ep a·tiptango gokgoke grapengachim.

Jingje : Ano Sinje, na·ade angming he·pabone. Angade aksan mikkolchokchok dakainok.

Sinje : Adasong mamasong rimpaosa, Abiba.

Kimse : Aia, Sariba, maidake nang abiko saksan galnok mo?

Sinje : Hai, Sarisongba. Sa·ra ro·jola gita mikkang grongjolnade.

Kimse : Namainechim, Sari. Indinba Abi Merajingna mikkang rimai roangachim angade.

Jingje : Aia! ho·e namainok Sariba! Hai chingming he·pabo, Sarine.

Kimse : Awangsongo sing·chengna nanggne. Sari ne.

Indakmitingon adatang Rinjang nokkona sokbaaha. Jingje bik mikchi ripbakgalgale:

Jingje : Aia! bochi sokbara! Hai salam!

Bochitang : Maina mikchi se·ep se·ep na·ara, namengama? Mija nang adara aganbapaja dakaia. Itjara ano Kimse? Hai nang sariming he·panema?

Kimse : Namainechim, Abi. Awangsong badinebai?

Jingjema : Saenga inara namkaljokma?

Namchiktang : Namengjok, Mani. Bi·sarangba namtokenga da·ode.

Rinjang : Jingje iachi he·ba.

Jingje : Maina, Ada?

Rinjang : Na·a mama manini mikkango indake sodrok mindrok dake mesoka dakbo. Maiko agana nanga ama skijokkonba?

Jingje : Aganjok.

Bochitang : Maina duk ong·a. Jeko sing·a, nangako aganchakaibo.

- Jingje : Angade ano Sinjeko rimna...am-engachim.
- Rinjang : Da-o ja-rikjaode basako sapna! Ja-mano Sinjena segipa am-ode sawasa ja-rikskanok, namjok da-on!
- Sinje : Sari Kimsekoba rimengachim?
- Santopa : He-na sikode rimaibo. Uchi abitang jinmana su-chak song-chakna namkalgne bebe.

Jingjea bochitang sokbarana, minggipin Sinje ming Kimseko rimchapna man-ana gisiko on-tisa ka-timtim dakangachim.

- Rinjang : Cha-man ringmankrimode, hai! Inchade Nongal chikolko dona salinok.
- Santopa : Nambebenokai. Hai, chakattokbojok!
- Kawakpa : Angkotisonga...maikoba ra-chakna rim-chakna nangode, hai.
- Jingjepa : Anoa gansre chisnreaniko ra-jokma? Sanjing! Ra, nang abini ba-rako bobojok. Hai!

Bitchi beng-bong inako janti bojopilako Jingjema dikchok ole, rang gore ko-sa rik rapsa aro ba-ra nok patsa Jingjepa bobite, Kawakma mirong ole do-koksep kabite, Jingjena chawari sing-na re-chakatangaha. Jingje a-ding doangmitingo songtangko nipile mikchi ga-akengachim:

Gana tangsim kingbalbal,
 Aiao nomil ro-rengbal,
 Chadol gipbok kingtaltal,
 Re-a nanggo ro-rengbal!
 Chasong chasong dakbewal,
 Ian A-chikni bewal;
 Kringtangko sannanga,
 Ma-an ja-kol ga-anga?
 Aiao a-chang do-misal,
 Gisikenga mikasal;
 Nang-nan rasong on-engga,
 Nang-kon ring-mittelenga!
 Mikgron mikchi jingjangjang,
 Rim-e ka-tong ka-suang,

An·tang biding ripingna,
 Nanggo chame kringna!
 Aiao ripbok do·katchi,
 Tosoknema nang gunchi?
 Atchai sona biginchi,
 Srenema nang gamchatachi?
 Gana tangsim kingbalbal,
 Aiao nomil ro·rengbal!
 Nanggo nomil ro·rengbal!

.....

14. Noknapea:

Darang pattal song Nongal chiring chisamo dongachim. Bibraoni chisamgrogro re·na nangachim. Sal a·kong mriaha. Sin·kari a·bachengmiting ong·ani gimin chisamo sin·jrikjrik an·sengachim. Kimbaru chiring dare onchakchakgipako re·pakangode be·en gimik an·jrimjrim ka·sinpilachim. Silang balikingjoljol me·mang koksi nikwareng gin·gen gin·gen silangko wepripdape nitoatan baksana kakku grimni bibalrang bate sildapatachim.

- Jingje : Baba, injode rong·ma gisimgipa bang·akon?
- Pagipa : Ban rong·mana, he·ara koelasana. A·bri gimikan koelarara anggalrara. Indake ja·rek ja·rek nagalchimengako nikja.
- Sinje : Pajong, he·a koelara, rakama nom·asai?
- Jingjepa : Haidamai, Anoba. Sawa c'okkinge nipai da·oa. So·ode kama. Jangkal a·kaweo he·koan Nepal anggal dake so·e atte gitchi dokenga.
- Rinjang : Aganpa·engbo. Koelade gamchatgipa a·ningni gamna nikja. Ambinde haidarok cho·e bikotnekon. Sorkari babudrang da·on nina he·batokengjokna.
- Santopa : Bebejokai iade mo? Mai nangkua cho·wakwake bikotnara mo?

Sinje : Aiao, Abi, ia chidare an·sengasai! Be·en gimik
chikjrimjrim dakpila.

Jingje : Bochi, ia bijak ro·rit ro·rit ku·teo koksi dake nanggipara
maibai?

Bochitang : He·ara ku·alkap. Me·mang koksi ineba minga.
Man·anakonnai he·ade?

Rinjang : Wai, ramram da dangtap. Uni sekkide grengrokpila
kamanane. Man·aba man·ana, ho·e.

Santopa : Ojarangde samna ra·ana. Man·naba krara ho·e, iara.

Adita re·angon chinalsachi te·brong grim grim chasrongako nikataha.
Songo achak sing·ani ku·rangkoba knaaha. Nomilrangni chigao ka·srok
ka·srok serejing ring·engakoba knasona man·ahachim.

Singje : Aiao, Abi, songde an·senga da·ning! Kna kna.

Jingjepa : Songtangko rasong dakagita. Aia, skangde
an·sengmanchagipa. Anga nachipgija jarojok.

Jingjema : Mini angni nang·pana rotimitingode an·sengmanchara.
Nongalonikoan sippru kole kole cha·rongpara angade.

Jingjemani sul salpile gitcam salrangko gisik ra·ate skimana jinma
ka·dinggrimaha. Chigao wal·tim so·pile panterang autokenga, jinma
re·baengako niksoe, ba·ra gandingdangtokaha. Te·kra wari ja·chokko
bate chigao miksu jaksue doangon song napjoleaha. Gittim chonoba
a·kaweo jinjin nok rike roani gimin sa·ra apsan dakaiachim. Achak
jinma chagingime sing·anan rama re·na jajapilengachim.

Sanejing : Aia, mamasong sokbaenga! Ama, Ama.

Nokningchi napange am·pok mora de·dingdange chasotokaha.

Jalapa : Senggnang salgnangba he·dil dodilbatokpa. Konjinga,
wai Konjing.

Konjing : Ma!na?

Jalapa : Ra, wetwet gantong debai wa·al so·at.

Mirajing : Aia, Sari Jingjesa. Angade sawa nesachim. Hai salam.
Hai nokningchi napbo.

Rinjang : Nampaengama, Mamara? Hai salam.

Jalapa : Nampaenga, Anggri, da·omangmangde. Nama nesa
maiako.

Jalama : Aia saria, maidake walosa sokbai kal·jok? Adaba
senggang salgnangba he·dilpaosa. Ramaode wena
kon·a grima?

Jingjema : Gri, Sari, da·ode ka·sinpaenga. Rima rima sarinaba.
Hai salam.

Rinjang : Hai mani nang·kode salam ka·kuja. Nampaengama?

Soka soka gimal naa inako knaon manderang tom·batokaha.
Me·apa me·chikmarang Jingjema Jingjepako mikkang grongna
chabatokaha. Songa noka krimkro Jalapani sa·rao wal·tim chake
sing·grik sangrike waltongsana ringmil cha·mile an·sengtokaha.

Doding : (Jalasingko jakskuchi nel·pake) Ada. Mamasongni
gittimde manisongni a·songde, chanchian dingdangkon
mangsongan dingtangakonne.

Jalasing : Jrip! Maiko wakreka dakenga! Mama mani sokana
indinrama dakama.

Radin : Angjong, chra angde rimbite jikchol sadu jakbite ma·chi
nochi maina soka sokronga ha·aibojok.

Doding : Awa mikkang mikterok mik·gron nichabregija Mirajingni
gitchingo atchonggipan Jingjekonde? Uni sambao
ka·ding wajoenggipara sawasa?

Radin : Mikkang talpana inoa biming man·pana sikoa
he·angbroke sing·e nia dakpaibo, Angjongba.

.

15. Chawari sing·a:

Sonibar salgimikde mahari mikkang grongtingen a·sel cham·aichim.
Ru·uta bilsa ja·mansa Jingjepa ma·ni nokkona soktaiani gimin ma·drang
jinma, pa gachi gimik, mikkang grongna tom·batokachim.

Sinje : Abi, na·ara gumeko name talpajokma?

Jingje : (Ka·ding mitchim, bamchikchike) Gri, Ano, bao?

Sinje : Awa! Mande an·gitchak dokrogipa. Chola
gikchakmrangmrang dakgipako krue
chadengenggipara. Chisam do·misal gita, matkimderong
gita, chanangaba da·aning!

Jingje : Dut, anoba!

Namedake niatna kratcha·paiming mikgisepchi cha·ue chame
mikkang nina jinma jatchioniko niatrokrokengachim. Jingjeba
gisiktangode silnikengachim.

Sal onchok onchok dakangon manderang Jalapani soneja mikkango
warekrek am·pok mora de·dingdange asongdultokaha.

Rinjang : Mama chingade ambichi atchuchi maina
noknapengachim an·tangtangni mangsongako talatpana
sikpaengachim. Mamara mania, ambia atchua
badinpanebei?

Jalapa : Sana sengkuna. Sako nichakkuna Na·song
mangsongako agangriktokaibo, Anggria.

Rinjang : Na·song indinpaode, angade Awang Sorapako
namanikachim. Na·an songni soldarba soldar. Hai katta
chengdilo namnekon, Awang?

Samepa : Ho·e namjok, Angboning! Bebe sana nichakkuna. Ra
do·ga odilbo.

Sorapa : Na·an pagipakala, Boningba, nang·kon
mikchakalachim. Ra, na·an.

Samepa : Badinram·ani jat? Bebegitaba, barake, mosako
boningko, noko namchikko atte rong·o den·teka gita
kari chio sim·beka gita sing·tek santeksopana.
Na·songan jikchol sadu nisoemani bochi insoe je jakoba
aganrimna jakkekalparade, Boningba!

- Me·apa : Ho·e bebe, na·songan jikchol saduko badi gittim batbara maina sa·ra robara sing·rok sanroksona jakkekala, nanggo!
- Sorapa : Ahem! Na·song itaiode, anga sana jechakkuna. Me·apa gitcham agana gita, stuna tang·rakjaoba, hakna sappajaoba, kattako a·bachengainok. On·chisa jikjakako jripchengkubo! Hai, nanggiparara sinbatokbo hai! Atcha. Songo rogipa a·ko cha·gipa, songa noka jang·ke do·ga, Mama Ada gimik, Pa Gachi unia Mosa Boning, Ang Jikchol Sadu, Ama Angno indakeming Angjong Anggri gimikba, nachil songpabone!
- Me·apa : He·dinesa nanggo, iasa katta chengani rama.
- Sorapa : Je jako agan golpona skangba, adatang Rinjangpako sing·chengnok mo?
- Samepa : Ho·ea, Boning, nanggipara bisongsa. Uni gimin bikon sing·chengna ga·aka, chomot!
- Sorapa : Atcha! Adatang Rinjangpa! Nang·ni ma·chi nochi, nang pa gachiona, he·barani mangsongako, ia tom·kagipa timolgipa gimikna, tale aganchengeni, Adatang.
- Jingjepa : Aham! Songma songracha gimik, Ama Angno Pa Gachi gimikba, Ang Jonga Gri gimikba, knapabo! Anga aganchengpana. Angade, Jingjepa Jingjemade, an·tang ammanng man·nangja manchaian, an·tang jakgitdokna, an·tang kang·karena, bilsre jaksrepana ineming, bibol mikgitdoknaba wa·ge ja·koranaba, noko rikgrioba jamo gamgrioba, manitangan rikgitcham mamatangan gam gitcham – me·apani agana gita mo? Unasa an·tang ma·chi nochi, kera ningku ole manggot chale nibaenga. An·tang jonga griko atte pongko gita, gitichi pongko gita, an·tangko aldu mittangpachina bi·amna he·baparachim angade.
- Sorapa : Namaijok, Adatang, ong·aijok! Da·ora sako mancha, Ada, biming mingsrango namne mo?
- Samepa : Ong·a, ong·chomota. Jekoba an·tang miknapako, jangkoba grikoba kange ra·na nangasai.

- Me·apa : Ho·e da·ning, gritanga bang·a. Bimingde mingna nanggnokai.
- Jingjepa : Angade, anggri Jalasingkoan, an·tangnade miksongachim.
- Sorapa : Atcha. Ang demechik, mai mingachim?
- Rinjang : Jingje, Awang.
- Sorapa : Ano Jingje bao?
- Jingje : (Gam·brebregija nikomkome) Inja!
- Sorapa : Ano na·ara, nang·pani agana gitan, appade gamna rim·na amrakjaangengjok, ama appako aldu mittangpachina angse appa nanga ine, nang nio amachi sandina mangamna he·barama, ma nang·ma nang·pani, nang ada mamani he·na nanga dona nanga inanasa he·barama? Nang·ni gisikni miksongako kakketko aganbo ano ne.
- Jingje : Anga an·tang kusi ong·e he·bara.
- Sorapa : De, ong·aijok, ano.
- Rinjang : Ho·e, ambi atchu nio ama gimik. Ama appa amangjaengjok, hai adara mamara, ambichi atchuchi he·dil dodile nipabo ine ang nogipa Jingje rimanasa chingaba ja·ku rikbapara.
- Sorapa : Ong·aijok da·ode! Nok nokgipa, ba·nok chi·nokgipako sing·na nang·gnok. Na·song gimikan knajokde mo? Angboninga namchiktangko jakrara watpilatnema angaba watjawa ine ka·sapane, Boning nang·nasajok Jingjede.

Jinma grao dake ka·dingtokaha.

- Jalapa : Badinram·a? Ba·nokgipa ma·gipaosa sing·bo.
- Jalama : Aia Ada, na·a an·tangs gamkaroke aldupilna nangaine. Kamna ino aragong he·ade, cha·na ino koksrong Jalade. Ma·na bol pangsa ritdame nikuja, pana wa·ding dingsa ochake on·kuja. Attepong gitchipongde

chel·sranga. Sing·kangkare gongdolja kang·karean
gongdipja. Ada, na·a gitchipilaine. Angde gong·jaoan,
sarina bochina, on·susua gita botsusua gita dakaine.
Maiako kangna he·ko aragongkoa.

Sorapa : De da·ode, anggri Jalasing bao?

Jalasing : Ia.

Sorapa : Anggri, nang mama nang mani maiko agana knarama?

Jalasing : Im.

Sorapa : Nang jik Jingje maiko agana knarama?

Jalasing : (ku·misi agane) Im.

Sorapa : Na·ara, nang mama manina ka·sarama ka·saja?

Jalasing : Ka·sara.

Sorapa : Nang chame, nang·jik, Jingjena ka·sarama ka·saja?

Uko sing·ode Jalasing jrip dake a·ko nikome aganmitduaiachim.

Jalama : Nang mama maiko sing·enga knajama?

Jalasing : Barake dongdang nang jikna ka·sarama ina da·aoa?

Samepa : Nang·nan appani jongagri, angse appa, ine ja·ku
rikbaengoa biding sanbaengoa, Jingje nang jikgipa
ong·jama Ajong?

Sorapa : Indakode, nang chame Jingjena ka·sarama ka·saja?

Jalasing : Mandenade sawa ka·sajana.

Sorapa : Ka·sakonba?

Jalasing : Ka·sara ho·e!

Sorapa : Namjok, Anggri. He·ange nang mama maniko
mittangebo, ne?

Jalasing : Angade gong·paja na·aba!

Sorapa : Ha? Anggri? Na·ara hajar kotok mikkangoan ka·sara
ine ku·chakjok. Da·oa, barake jepilengkua?

Jalasing : Anga ra·gne inede aganpaenjaba! Gong·ja, angade!

- Samepa : Na·a maina gong·ja, uko tale aganskabo. Sakoba nika nia gnangma? Nang chame anina an·si an·dongjama, talatbo. Ra Ajong, ra.
- Sorapa : Ho·e, Anggri, nang·ni gong·gijani maiba ja·pangde gnangne. Ong·jaode na·a sakoba nika nia gnangna nanga, ong·jaode na·a chametangna mitchina sosina nanga. Maina gong·ja ja·pangko aganbo!
- Jalasing : Indakean gong·ja.
- Me·apa : Aia Ajonga Jalara, mandeska mikkango, nikgrak nigrak ku·chakna kracha·pagne. Mamatang manitangna ka·sa ka·galoba... chametang anitangko mikcha namnikoba, barake mandeska mikkang joldake da·aning! Mama ada dakgipa, awa gonggechi, ua mittinchi, name sing·sruke nipabo.
- Sorapa : Ho·e, ra Angjongdrang Anggridrang. Mosa boning nanggipaba. Jalasingko noksamchi rimange sing·e nitok.
- Samepa : Mitamde kracha·timakebna jekengkrotaia. Indakgipakode sruko mittino sing·osa nama.
- Me·apa : Na·songba, gitting gittang sing·enga. Aia, an·tangtanga mikkratpara nanggo.

Waltongsa gapna am·pile, jegita ropo sol·oba Jalasingko ku·chakatna man·jaengachim. Iachi Jingjede an·tangko jinma mikkango jegalani gimin mikgil sie chigitdango jaksi su·tekteke mikchi jokengachim. Sing·e nio man·teljai salgipino sing·taina dontongaiaha.

.....

16. Chawari sing·taia:

Songni panterang gimikan Jingjeni bimang daknangani gimin namen kusi ong·chakengachim. Robibar salo anti re·na watpilgija, salgimik ong·nasipile, Jalasingko pante jinma nokpanteo chipchange roptokengachim:

- Radin : Aiao angjong, chame maniko mittelchakparaja. Do·do do·rimit gita, ragong bolbijak gita, maina jechakmika dakenga na·ara?

- Doding : Ada na·a ada. Maina bochi silma silpako mikchi ong·atenga? Sakgitchake ro·rengbal, mikterokrok te·rakrak, bachi sildappakuna da·ning!
- Maling : Ho·e mo, Mosa. Noko namchikko tol·e mittela gita, moena peteng ching·aja, narang gimin giminsa! Gipin noa namchikkode indakako wilwilaode nikmanjane.
- Jalasing : Na·song gong·a kakket betbeteba ro. Angade mikgil rimuangengjok, ajamriketangengjok chupagnok, aaa. . .
- Doding : Chuoba mikgil sikjawa, bamo simak ra·jawa. Mikgil rimuangonan bochikoan jumang nikaine na·aba.
- Radin : Jumango ka·ding mitchim mitchim niata dakoan, gisik rinok rinok dakangainokde, Angjongba.
- Maling : Ka·tongan rakjokma jean jemikasama, Mosaba?
- Jalasing : Jemikginjai angade! Asol gong·ja inoa na·songa!
- Radin : Nongal chisam baliking joljol, balwa balsri balao, Jingjeko kru sone re·anga dakode, aiao, Angjong, baditan ka·srokchakenga angade!
- Doding : Ho·e mo Ada? Dakgipani dakaba rugipani ruaba, turisan dokcrime chikongsao chiripe daka rua ina gita chacha. Ada Jalako nioba koomade ong·paja, bochi Jingjeko nioba badiade ong·srangja nanggo!
- Jalasing : Dugara na·songa, mo? Gong·ja gong·ja inoba indakpile ropa!
- Maling : Mosa, chinga nang·ni chasongska troganda, nang·na indita ka·srokchakenga. Da bang·e jemika dak.

Uchiniba Jingjeba, mikgron ginggron nichagija, grapsimsime roengachim. Ma·gipaba demechikni cha·gija ringgija skimani gimin duk man·pilaha. Ripengtang Sinjeni molmeakoba knachakja, saritang Mirajingba ka·dimeatna jotton ka·enga, nini bambaniakon namatna man·jaengjokchim.

Jingiema : Anoa, miksu jaksugalbojok. Mandeska sokbatokengjok.

Sinje : Hai Abi, nokgilchi. Anga chi ra·bana.

Mirajing : Na·song he·soaibo, Sari. Anga ra·baina ne.

Changsatai, songgimik nokgimik, Jalapani sa·attalo warekrek
tom·taiaha.

Sorapa : An·ching mejasal matchotgijako kam a·bachengtainok,
mo?

Samepa : Sana sengdamkuna. Somaiba namchacha. Hai
dakdiltaibo.

Sorapa : Atcha. Anggri Jalasing, bao?

Jalasing : Ia.

Sorapa : Anggri, mejasalde nikgrak nigrak. Chamekoba anikoba,
silnikoba ka·dangoba, ho·e...changsa pil·sade jemika
dakna nangaia, mo?

Me·apa : Ho·ejaode, panteska bajuskaba, aiao sing·akoan
sengnapinja ina daka iaba!

Samepa : Angboning, an·ching an·tangtangba ha·aia. Jol
ku·chakpanade mikkang brat brat dakpara nanggo!

Sorapa : Anggri ra, da·aode nang mama manina, nangjik Jingjena,
nang gisikni mangsongako aganbojok Anggri.

Jalasing : Maina, gong·ja, angade!

Sorapa : Maina gong·ja?

Jalasing : Gong·ja inode gongja, maina!

Jalama : Na·a chacha Jala chacha. Da bang·e wakrekdama, wai.

Rinjang : Aia, mani sengkubo. Boning gisik gnangba. Chingko
watgaljawaba da·ning!

Sorapa : Anggri na·ara, chamenaba aninaba, bimang siloba
mikkang namoba, angade salsa salgni mandeni cholon
bewalko, su·a song·ako nikuna nanggne, sengkubo
inengama?

- Me·apa** : Ho·e Ajong, nang mama sing·atan namjok. Chasongna janggi tangrimnagipa jama rakrimnagipa, angade an·tang miknape bewalko nichengesa chanchigne ineba aganaibo.
- Rinjang** : Kakketba da·ning! Boning na·a indakeba aganaibo. Chingaba ka·dongna man·pana gita, ne?
- Jalasing** : Angade gong·jawa. Jegita sing·oba apsankon aganaine. He·a Konjingko rimangbo.
- Jalama** : Kotchol bi·sa na·a janggil sagi. Ang sok kane aldugipamangmang adako indake kal·stekna am·engama?

Ma·gipa am·bol ja kole depanteko dokna rikangaha. Nio sari gimik rim·tattimile am·bol ra·sekesa tameatna man·aijokchim.

- Rinjang** : Mani kema ka·aibo, boning mamingko ha·aipajaisa dongdang aganmikbrangenga. Bi·sa dambe ingipade chanchia chu·sokpaja.
- Jalama** : Ong·ja, Mani, bin gong·ja inon ang mikkang brat brat dakpile adana bochina kracha·paengjok. Da·o ind?ke kal·gitchie roenga. Ang tangenga dipatde na·a a?ako indake kal·na man·jawa, knara, Jala?
- Jalapa** : Jala, na·a, da·o ma·pani, mama adani kattako kratimgija wakrek wakrek inchaka dakenga...ja·mano duk man·ne ne. Na·a ang mikkango mama adako dal·ampa dake waki pinniknambe. Niam gita rama gita aganchakbo. Hajar kotok tom·enggipa nang gangbingako nina re·barama? Kracha·ja, akgolgri, ia bi·sa.
- Samepa** : Bebegitaba, Ajongba, salko jako nikchenggipa do·ki wakki ga·dapchenggipako dondape dakama? Mandeska atteskana kra nangdangakosa aganpabo!
- Jingjepa** : Na·a, Anggri, Ang chawari, da·o kracha·nikoba mikgil sinikoba ka·timtim chanchibo. Angade demechik saksakamkamko jongagri sakdokna palsusujawa botsusujawa. Siatoba na·ajok, tangatoba na·ajok.

Angade Jingjeko nang·mani noko donangaignok.
 Da·oba Jingjede nang·nin, knalba sotniba nang·nin
 ong·aine. Ang namenga dipatde nang·kon anggri sokchi
 ine nokkromna nokbichongna biding sanainagipa ja·ku
 rikainagipa angade.

Sorapa : Aiao, Adatang, an·tang changa sapa dipat aganskiede
 on·e nijok, indakean dakaibojok, Adatanga.

Jingjema : Bebegitaba, bachi rimpilpakuna bachi salpilpakuna. Nio
 jang·ke gaiba sari cha·che chakeba sengpakaljok anoan.

Jalama : Bochi, na·a duk man·nam, bachi jokna bia atchugipa.
 Bini ganggrachaa dakgipako sing·kangkare dipgijade
 watpiljawa. Angaba sok kansemseme mittanga bikoba.

Walgni salgni, pa gachi ama angno, mama ada, ripeng baju gimik
 topgrime rope sol·e nioba Jalasingko Jingjena ku·chakatna man·jaha.
 Uni gimin, Jingjeko Jalasingna cha·sengchina done ma·gipa pagipa
 Sombal pringo A·dinggrechi pil·angaha. Ripengtang Sinjeko rimrike
 Nongal chisamo ma·gipa pa·gipani pil·angako mikchichokchok Jingje
 nirikaiaha.

.....

17. A·kim gaa:

Jingje ma·paoni chele dong·e dukko man·an baksa, nio sari a·kim
 gana cha·che chakna nanga, aro pring an·tam mipal cha·rimpana am·oba
 Jalasing chakatpronge kataia, unode Jingjeba mipalming mikchiming,
 da·ning mipalko rim·chokchoke chakataiachim.

Walanti do·wal nia gita, do·bipa nol gabrangako rim·na sandia gita,
 ripengtang Sinjeko jakbite Jalasingko songgimik re·jojoe sandina
 nangachim. Gisepo saritang Mirajing dakchakpaenga, indiba Jalasing
 uchi pong·pret uchi chol·et joke chakaiachim. Da·ning Jingje, da·sinin
 mande an·cheppagipara tua roa tik ong·ja aro cha·a ringa sukja, bigilming
 grengming joldareng dake nikpilaijokchim.

Salsao Jingje saritang Mirajingming, a·jri gitdaloniko jal·ik stu akna
 baring dambe am·jolna, sarisa sakgittaman re·angachim.

- Jalama : Jala. He·ba, injo atchonge.
- Jalasing : Maina? Angade Nongal bisikchi dona am·enga.
- Sanejing : Adara maidake dal·ampa dakjringabai!
- Jalasing : Sanejing, na·a janggil am·engama?
- Sanejing : Na·ade uantokainok, ku·sa agansrapgija chel badaljringaine, maming ku·sa knachakgija jaktong kringchekaine.
- Jalasing : Bang·e betbetdamnambe, Sanejing, janggil!
- Ma·gipa : Na·achacha na·adingdinga, sano gando siksepchakna ineming chelko badaljringe jaktong kringringe wakreka dakenga? Brangna sikengama na·ara, Jala?
- Jalasing : Na·song salsal ku·dongako knatimana bate brangoan pang·sangsang namkalne, ho·e.
- Ma·gipa : Namjokde na·ade, Ajongde. O, da·ode grang chajok, ja·si dakjok, ma·ni noni aganparade ku·donga ong·aijokmo? Dingdet dingdet ang sokko cha·i dal·gipa mangmang, angko ku·donga potengjok?

Ma·gipani rang·rangana Jalasingba deldikdik dakpilaha. Maming ku·sa aganchakgija ma·gipani sambiko, jeba dakbo ingipa gita, asongdate chakaiaha.

- Jalasing : Maiko agana, aganboda, maina ku·sik raka?
- Ma·gipa : Na·asa angko ku·sik rakatengaba. Angde, na·a name nachil songe, knatimbo. Nibo, nang mamani nokchongde chasong gabrini nokchong. Basikba chasongoni cha·ri ra·srekuja janggi dintangkuja. An·chingan a·kim nokgipa an·chingan kosi nokgipa uko name ma·sie ra·bo. Unasa nang mama an·tang manggot chale kera ningku ole nang·na ja·ku rikbaenga, ha·aiama? Noa namchikko mittelpara gita, na·a indakgipa me·chikna agri maidakgipako angjik angde inpana am·enga? Bok ang ha·aijok ang knachengbajok inaoni, nang mama a·gipi saksaba bijak chon·chapjai ma·chi an·pilkuja, jika bilsa sokjai nochi katpilkuja.

Mamana adana mikkang rimapila. Jika dea nampagipade, nokdang ba·ku ka·singipade, indake ma·chi nochi nangana agride sokatgija man·a. Nikakonba?

Jalasing nipil nichagija ma·gipani ku·pattiana jrip mittip knatimaiachim.

Ma·gipa : Da·o na·a indake ganggrachai mesoksoode, nang nodrang sakgni gnang. Ja·mano sawa mama adako hai angming, niochi amachi noknape nipana am·rame bi·rame nipana ine na·ara ku·mongpanok. Na·an nang nodrangna sko chake dang·simdilnagipa. Nang jakrana knalo sotnio, nang nangskao, nang mosa boning chotpilode? Unosa wakidikdik dakgne. Na·ade Ajongde.

Jala gusuprame nokko niwilwale gisiko chanchiani nakataha.

Magipa : Nibo, Angde. Da·omangmangde jawa studapako chakna nangkuja darang jaksi otako chilna nangkuja. Nang·paba bil·sa dokpaima ku·sa inpaima. An·tang bil korokpile na·songko aldu mittangenga. Ku·sik man·a inana gam·ainambe, gisik sika inana dakainambe. Ja·man ja·wilna, kurina sa·chonna esapesa dakbo, angde ne. Na·an salko jako nikchenggipa, jekoba sko chakdilnagipa. Deskangna krakra ba·skangna namchacha, ma·ni pani kattako knatime, mama adani ja·ku nirike, dakpabo Angdea.

Jalasing : Im, jekoba jakoba, angade ka·timtimsa chanchie nigne.

Jalasingni nachilo chinapa gita marang sal·gijako do·bipa gitachakchi tatgala gita pang·sangsang dakaha. Ku·sa ku·gni aganchake chakatpronge re·angaha.

Sanejing : Barake indakchachai ka·sot rang·sot dakmangmangabai adade! Maming ku·san agana man·gija una janggil unaba janggil asolan.

Ma·gipa : Angkoan sok kane dal·atgipa ma·gipakoan gangbingbing chel badala dakna pa·engo na·akni nokuru. Basik salna ganggrachaa dakdamna biara.

Sanejing : Asolan uchi bochi Jingjede mipalming mikchiming.
Su·karok song·karokean da·o dikdik rooan mandean
mande dakangaengjok.

Ma·gipa : Barakna anoba. Nokoba namchikkoba indakatna
sikpajain deko aganade nipaenga. Gisik
chanchiningjaode nachil chinapningjaode dekoba
barakdapna. Tango aganchapaikaljok, sio
gimangaikaljok, noba namchikba!

.....

18. Sinje re·pilanga:

Jingje da·ning Sinje songchi re·angpilna am·engani gimin namen duk
man·beengachim:

Jingje : Ano Sinje, salsa salgni... ano angming rokubo, na·a.

Sinje : Aia Abiba. Salsa salgni intingean jagni gappiljok. Ama
aganatengjokna. Naljokoa basakoba he·bataine, ne,
Abi, ne.

Jingje : Angade rasong grinakakon Ano. Barakgnoksai angai!

Sinje : Gume gisik nom·aine na·a, Abi. Do·koan wakkoan jol
jalde man·painja. Da·okni gumede mandesemsem.
Sengkinapbo, Abiba.

Jingje : Him! Nang ku·sik gita ong·paodechim!

Sinje : Mani sari gimikan nang·nara ka·satoka. Na·an ang
janggilditoan angko gualainede, tol·anode nibo na·a abi.

Jingje : Ropakubo inoba na·aba kamgnangpara, ho·e.

Sinje : Gumeko man·esa he·babo, Abine. Nang jakoni
jokatnambe, ne.

Jingje : Kal·angaibo...Ano, na·aba.

Sinje Nongal anti cha·na re·anggiparangming balbingbing
ja·rikangaha. Jingje chisamo jak ripripe mikchi rue rue nirikaiaha.

Jalama : Anoa Jingjea. Da, duga duk ong·a. Chasongnaba aganchai roaibojok. Aganoba skioba gingtong balwa ringaia, maiko Jalakoa.

Mikchi se·ep se·ep nichagija:

Jingje : Maiko aganchapana. Tol·e mitdakpanaba, Maniba. Ang rasong namjaisa anga sengkinapjaisa. Gisik dukko man·enga.

Sanejing : Aiao, Sariba. Maina indakpile an·tangko onnatenga. Ada gisik griakoba badine inkuna. Basakona mipalming mikchiming dakatnok sariko? Sari, duk man·chanam. Chingaba nang·koan man·natpana sikpaengachim.

Jalapa : Jingjea maina duk ong·damenga. Agri grapsimsimode an·tangan bika sagnede. Da·meku atchugipako anga kritgalna man·kuja. Chakatpronge chakatpronge kata dakenga.

Jalama : Na·ara namkale sikjete nol·jete agane nipa. Nang ku·saba injana ganggra chaengade uara.

Jalapa : Siknangkujaenga.

.....

19. Jalasingko pagipa tata:

An·tamsaode pagipani mi cha·miting tiktako Jalasing nokchi mi cha·na re·baengachim. Jingjeba aro nodrangba chigachinin sokbakujachim.

Pagipa : Jala injo atchong.

Deldikdik dake:

Jalasing : Maina?

Magipa : Nangana okamo maina sing·pila? He·baboda.

Jalasing : Atchonga amchakjaian mi cha·gnede angara!

Pagipa : Na·ara maj·manchako dakenga?

Jalasing : (Mipal engjoljole) Maidakenga angara? Gride dakinjade.

Pagipa : Na·ara nang mamani bil be·angengko nikrikengama nikrikja?

Jalasing : Ima! Nikrikoba angara barakna ukoa?

Magipa : He·a Jalachachade pani aganakoba itdinchachara dakaigne!

Jalasing ku·saba aganchakgija nikomkome mi cha·engachim.

Pagipa : Ajonga. Ma·ni pani, mamani adani, kattako manigija ramako nirikgija dakade namja. Skatang dakgipade skatangni ja·gao nanga, ha·aia? Mikkang janggal, an·pil ketchi nigrike, niamko bidingko ja·rikosa mandeska mande minga. Cholgrioba choldakjaoba unosa mandeskaba mande ra·a. Dongdang, aska pau, chanchiram·aiode namja. Gamoba rim·oba gam ong·ja. Nokdangba ba·kuba ka·sinja. Name jongkime chanchie ja·ku de·osa nama. Udakgipa mandesa gam·oba rim·oba a·bakku nika. Niamkode gualnambe. Dakbewalkode jaktuatnambe. Na·ara dal·ara dal·jok gisikba chanchinara sapjok. Ajong, na·a gisik rongchike chanchibo. Knara nachil?

Jalasing : Im.

Uko ku·sa inari chakatpronge katangaiaha.

Jalapa : Nikrikama, Nang·mara? Katta matchotgijan cheng·pongangmanjok.

Jalama : Ang aganpaoba udakchachaia wai, Nang·pa.

Dedrang aro namchiktang sokbachangani gimin an·tangtango nitatgrike katta dontongaiaha.

.....

20. Songo gro man·a:

An·tam simsim manderangni miattam cha·ap ong·o:

- Mirema : San marangko keenga na·ara, ma Mire? Dugajok!
Chasong ama appa dakgijako, na·ade sogede.
- Mirepa : Sawa maiko kea, ma nang·ma?
- Mirema : Na·ara, budepara kalara! Demechikni okret ka·ret
dakakoba nikjama?
- Mirepa : Salba jaba! Detangni bikmako nie rona, angara jarama?
- Mirema : Nang ong·akoan man·a, he·a nang·deba.
- Mirepa : Na·ara seng·gipara bao chusudima?
- Mirema : Salba mai! Nang·ko aganode kore chapilgne, pt...!
- Mirepa : Baoniko keana Anoa, ma Ano?
- Mirema : Indake ku·dimchotchote donaibo na·ade.
- Mirepa : Ima, aganjaode saksa boc rona nangainokai, Ano
na·ade!
- Mirema : Na·ara budepara nagoka...wa·korangchi gai gai chime
sing·na man·jama?
- Mirepa : Sapajawanama da·ning! Indinan ke·bita ghangpaengo,
na·aba.

Ma·gipa am·bol wa·korang wa·sakalako kole janggilo chimgannggie
sing·aha. Unosa Mire mikchi ripbakjoljole:

- Mire : Gume Dabo...Ama. Ama kema ka·bo. Anga timmangiok.
- Ma·gipa : Soge matchàskok...gume appa ha·aigija
on·ramramaiama? Game sibo!
- Pagipa : Barake na·aba Anoba, pt.... Am·oba ke·ako nangako
am·paosachim.

Mire ma·gipa songni soldarchi joljol re·ange nalis ka·eaha. Je
ong·oba salgipin songko nokko tom·ataignok ine watpilataiachim. Pring
salchugragra dakbaon songni manderang Mirema Mirepani sa·raona
tom·batokaha.

- Soldar : Mijattama, Mire ma·gipasonga, maina songko nokko tom·atna angko aganeachim? Songni nokni manderangna ra, talatcheng.
- Mirema : Maiako agankuna. Salba jaba. Mire sogē bima, matcha skoka sagi. Gumetang Manggapana ga·krange on·nana... asolan, boengjok. Cholgri apgriparana, jari sogē dakana indakrame kal·steka. Na·song sandie on·pachinasa okama, angade.
- Manggapa : Hu, baoniko dongdang tol·rama, gamjawama?
- Soldar : Wai, jrip chengbo. Badini katta matchotgija huhudonambe.
- Manggama : Aia, tol·e aljokma, bean bebejokma! Bano itdakramjokai Manggapa na·ara?
- Soldar : Na·songa, sengcheng wai. Songko nokko chonnikode sakgnian man·e ra·gnene.
- Manggama : Angko wachamdap srangdapmanoa maiko man·dapkunabai?
- Kawakpa : Ho·e. An·chadapama toredapama, soldarni bichalna seng.
- Santopa : Sengnapja dakengkipara he·ara... janggal am·engade.
- Soldar : Atcha. Jeba ong·bo. Grode gro. Songna nokna pakwatani gimin talgriknade nangainok. Mirea bao?
- Mire : (A·ko nikomkome) Inja.
- Soldar : Mire, nang·ma maiko agana, uara bebema? Na·a songni nokni mikkango kakketko aganbo. Tol·ode namjane. Groni kosako gro ong·a. Uni gimin, mai mancha ong·a aganbo. Kracha·ani jaksi chikani ong·oba, maming donrua mitdapa grian aganbone, anone. Gro matchotgija darangba maming dakna man·jawane.
- Kawakpa : Ho·e. Ong·jaode, songko nokko chonnika ga·aka, mo?
- Soldar : Ra, Mire aganatbo, ra.
- Mire : (Mikgitchak pegitchak niwingwange) Angara, a·brengo

am·bol sote ding·ana a·ba noko balwa chakaparachim.
Unoara chuchipjok. Unoara gume Dabo, (grapjoljole)
bachini he·babai, angko, angko...

Santopa : Maikosa, angko angko ine bonchipenga, ia jaria?

Soldar : Ho·e Ano! Kracha·aoba jaksi chikoba, kakketko
aganbo, ne!

Kawak : Jawako mitdakna jawako so·dodonade hehedoaia
nangakode... indinchachai, gume Dabo angko angko,
inaenggne, kotchol bimade.

Mirema : Maina knatimenga, Ajongba, alimila janggil rim·rokat.

Santopa : Soldar maiko agana knajama?

Mire : Gipakeming maiba jolaia, uuuu....

Manggama : Nang·koa mandesemsemnesa kimparachim, na·ara
achaksama?

Manggapa : Hu, barake semapa sepako achak inrama! Hu, mangnengai!

Mirema : Achaknoba pagongsade he·ara. Jawa balwa chakako,
jawa chugualako am·e dongramaiama?

Soldar : Na·ara jechakpaja? Chrikaba chrikja?

Mire : Chrikna inoba, gumean on·ninja, uuuu...

Soldar : Ong·gijako, mitchia sosiako, mandeko mande minggija
sing·para gita, uasanma changgipin gipinbama?

Mire : Gimik changgittam gappiljok, uuuu...

Soldar : Manggapa Dabo, bao?

Manggapa : Hu, inja.

Soldar : Na·a maiko daka? Mireni kattara bebema? Na·ade
an·chajok torejok, gro ong·jok...marangko
donmitdape tol·nambe. Kakketko aganbo.

Manggapa : Hu, tol·enja tol·ade. Bian jamsrengo watgale roajokona.
Biara gong·aba gong·aiade. Hu...angaba, jamang
jamang ga·tuangiok, hu.

Kawakpa : Jara gaptek, jara mil·lok na·a! Ma·ni noni ba·paraba,
ong·na inming ong·bebejok, pt...!

Soldar : Da·aoara, che, gro ong·jokde! Songgita nokgita
matchotjok. Na·song gimikan knarika mo? Me·aba
me·chikba jeara jenikja. Da·oara angade, maiko rai
ratkuna. Ra, na·song nokdang gita chanchieni.

Kawak : Kotchol bima, mahari gimikko jaksi chikatgipa. Panteko
am·e kimna nikjawa, noska abitangko an·chadap
toredape rogipa, akgol grima?

Chratangna ma·at ma·at ban okgnang ban ka·gnang salromrome
momataiaha.

Mirema : Ki ka·chip! Ki ka·chip! Baring mintangaming gal·dako
jal·ik sai kapa kapa, dok ajong dok, sawa gro rikna,
anga gnang, sio gope galaina.

Uchiba Kawakpa, mamatang o·gipana krakra Manggapa Daboko
an·bol ja wa·sakalachi chimganggiaha.

Manggapa : Hu, ai·a, Mama, timmangasa, ai·a, Mama, ja·guasa, ai·a,
Mama, sadugara, hu.

Sako so·mal cha·na, sako dai dawa am·kuna, nokwewe ku·monge,
doke sate agane ku·pattie on·e adil mittugrike bon·aiaha.

.....

21. Panterang esonja:

Iachi Jingjede indita Jalasingna cha·senga bilsu sokpangpilna
am·engjokchim; indiba, mipal cha·rimna chite ringrimna cholkoan
man·kujaengachim. Songni panterangba walo tusukja rosukja
daktokengachim. Jalasingara an·tangming Jingje nape tuna kene walanti
panteskaming, jeming man·a, nape tuaiachim. Panterangara
an·tangtangko denggu ma·su daka ine rim·na kenpai waljatchioba
Jalasing nape tuode chakate katna nangaiachim.

Radin : Aia, Jong Jala! Inchaba ambinba denggu ma·su daka
potgne. Angchide da he·babo. Namjaneba inaibo,
Angjong ne!

- Jalasing : Na·aba Jingjena sale on·nenggipajokona.
- Radin : Je neba inaibo. Basik walna gitchiatna am·skaenga, na·ara?
- Maling : Ho·e, Mosa. Jingje cha·senga kakket na·a nokpantechi da he·basrang.
- Doding : Aia, Ada! Angmingde chuna man·chomotjajoka! Cha·gnian giso, agangnisa kiro.
- Jalasing : Indakoa na·songa, angko alokgalengjokma?
- Radin : Jingje cha·sengaonin chinga dakna nangachim.
- Maling : Mosa, je neba roaibo, nokpanteode esonjajoka, ne.
- Pante : Nang·na jikgipa cha·sengana chinga maina krat olpanok?
- Doding : Basakobade salo chusudimupila. Hit, unode ka·dingstekako nikja?
- Jalasing : Sawa barakgipa maidakna ham·enga angkoa? Angaba biaptang a·damtang. Na·songba sim·paktang a·tiptang.
- Maling : Aia, mosa, da itdina dak! Na·aba niamkoa ha·aia. Indinba na·ara me·apasa chingara pantesa. Nokpanteode me·apa hapgri.
- Jalasing : (Gang·bengbeng chakate) Angara me·apama? Jingje cha·sengana angko me·apa ina man·aia?
- Doding : Ho·ejaode maisa, Adaba! Na·a bochi Jingjeko ra·oba ra·jaoba nang·ko a·kim watja kakkette na·ade indinba me·apa.
- Maling : Na·ara niamko bachi galna, Mosa? Ku·matparako ina gita, nang·ko angse appa inean mipal dinna chite kona Jingjea nang·na akim gajaengama indakoa?
- Jalasing : (Bang·e jedamna cholnijajok) Da·mo. Na·songkoba nikaine...

.....

22. Jingje Jalasingko siknanga:

Nokpanteoni panterang alok galani gimin Jalasingni gisiko namen duk man-beaha. Konjing saksan ma-giparangni nokoni adita chel-kalao jamsreng rike tuengachim. Jalasing darangoba apnikjai jonggipaming napkete tuaha. Jonggipa adatangna kene jrip jrip tuengachim:

Dimrimchi : Abi, da-awalde Jalade bachi jajokangasai? Am-oan nikjaenga.

Jingje : Nokpanteoa, gri?

Dimrimchi : Panteskade esoninjajokchimai gumekode.

Mirajing : Bachi ong-na nanga?

Jingje : San noko tuna nanga na-song nikaoa, ano?

Dimrimchi : Hai, Konjingni jamsrengchiko nikuja.

Mirajing : Bebejokai.

Ja-birang gam-atgija sakgittaman re-angaha. Noksam ong-ani gimin nokni achakrangba sing-gija ja-sa-rikangpilaiachim. Noksam pakmao knatime, ku-misichi:

Dimrimchi : Konjing. Konjing. Jala chuengama?

Konjingba an-tangnade nachil seng-engachim. Jalasing walanti katjojoe neng-ani mikgil sikwekangaha:

Konjing : (Ku-misichi) Im.

Jamsreng ong-oba gengsri ma-kete kaani gimin indita wa-se gam-jachim; indaken Konjingni chakatbako aro Jingjeni nape tuako Jalasing uisojaha.

Jingje waltongsa ong-nasipile a-palo re-jojoani gimin uni ja-a jakrang chikachim; indaken Jingjeni gipakaton rang-san:

Jalasing : Sawasa chikjrimjrim?

Jingje : Angasa na-a.

Jalasing rang-san biaponi chakatchrakachim. Da-ning, Jingje chol man-ade man-a, Jalsasingni seng-kiko rim-simakaiaha:

Jalasing : Aia Jingje. Barake seng-kio bitsima? Watbo! Watbo ne chotgnok!

- Jingje : Maina! Watjajoka angade! Chotna kenoa jrip chupabo!
- Jalasing : Hit sala. Jingje, watbo nesai!
- Jingje : Na·ara angna ka·sapainjama indakoa? Nang sika gita dakaibo, watjawa.

Jalasingba rake krengna mandeska knana kenenga bewalai jiloa Jingjeni jakmikkepkoan balgrengatna man·jaenga, uchi Jingjeba badita jila inditan rakbate rim·sima aro jaksachi changkichono gipaktata dake, sakgni tangtang mitdu mitdu pru pru, Konjingni jamsrengo andalmitdik dakgriktokengachim. Dimrimchiming Mirajingba adita chel·kalao Jalasing maibakai katode nirikna ine time roengachim.

- Dimrimchi : (On·tisa ku·rang gam·kale) Jalade da·alde ban a·ningchi nape chakjoksai, am·anggipa abi Jingjeba bao gimasrangjokbai!
- Mirajing : Ho·e nesai, Sari. Bochi Jingjekoan nikjaenga, bachiko am·pilnokbai?

Dimrimchini aro Mirajingni ku·sikko knaode Jalasing bate kenengjokchim. Jingje nape turimna man·jokna inode joktel·jajoka ine Jalasing jokna jotton ka·beaha. Rakdugai jiloa seng·ki chotgnok unode gandogri bachi katkuna, da·ning Jalasingna chol grijokchim:

- Jalasing : Jingje na·a, ka·sapai, ra watcheng. Inchade seng·ki chotgnok wai.
- Jingje : Jrip jrip chusugija maina jila dakpaenga, na·aba.
- Jalasing : Siss ka·sine. Dimrimchiming Mirajing a·palo betbetenga knagnok.
- Jingje : Knaode nampajok, angna sakki ong·panok.
- Jalasing : Na·ara jari dakaiade. Konjing kotchol angko pale cha·a, da·me nang·ko.
- Jingje : Nang napbarakoa angan nirike roengo, ban Konjing da·ning.

Uchiba Dimrimchiming Mirajingba gusuprama dake golpokosan golpo ka·a daktokaiachim. Jalasingba a·palo nodrang miksongen dongtimenga ine ma·sien namen jakkegijao jang·nangahachim.

Jalasing : Na·song me·chik kakket meladima, mo Jingje?
 Jingje : Ho·e. Gimikan nang·ko man·natna sikpara da·ning!
 Jalsing : Da·ningja maja. Dut, na·a mechik namja.
 Jingje : Maidaka angara, na·ara angna ka·sachomotjama?

Jingje jaksamsa Jalasingni seng·kiko rim·tate aro jaks a gipake mikchi tottotpile gam·gija grapaha. Jalasingni janggilo mikchi ding·bom ding·bom tingtotdapon uaba gisik nom·angaha, aro ka·sine, grapjachina mol·molpilengachim. Pringode Jalasing sa·rao menggo oksaa gita jomrokaha.

.....

23. Jingjema Jingjema knasoa:

Jena ino a·kimtang galna ino chametang, Jalasing ianpakde jokteljajok. Ma·ni pani mikkango, noni jongni gisepo, mipal palsan engrimna nangaijok, chite te·san ringrimna ga·akjok. Uchi A·dinggreonaba salsa salgni ja·manan katta tang·satangaha:

Jingjema : Wai, Nang·ma.
 Jingjema : Mainabai?
 Jingjema : An·chingde Sonibaro Darang Pattal he·na nangginok, hai!
 Jingjema : Aia ano cholipajoknama?
 Jingjema : Im. Mipal cha·rimaijokna, chite ringrimaijokna. Aganatengjok.
 Jingjema : Namaijok, Nang·paba. Ario cholipaode nang·na jaksrea gita dakpanok.
 Jingjema : Ho·e. Choliijaoba choldakjaoba. Su·songanga gita ge·botanga gita. Jikse aganrima matchotgijan uchi jikchol sadu gimik noknapbajok.
 Kawakpa : Pajongtangsonga, anoa ong·aijoknama?
 Jingjema : (Ka·ding mitchim nisoe) Ho·e na, Na·song.

- Kawakma : (Abitangko doktope) Aia nampajok, Abiba.
- Jingjema : Nampajok ho-e Anoba. Rasong nampaenga.
- Kawakma : Rasong nampaian man-bai on-engjok nanggo Abiba!
- Santoma : Da-o jakrasoeming hambin chotpilosa uangrikgne, Manitungba.
- Sinjema : Songo roringipade a-ko cha-rimgipade jakragrika gita dakaine nanggo, mo Manitung?
- Santopa : Da-o basako il-lengtokma ham-eng? Anggrina aganatjokma?
- Jingjema : Maiako ineming dokdamkunabai. Ambin Sonibaro inengachim.
- Kawakpa : Ajong Ringjang kobol man-jokode namainok.
- Kawakma : Salsa ro-ang walsa ro-ang maina dipdipdamkuna bebe.

.....

24. Mahari sokkrima:

Bilsi gimik nio sari noko cha-senge mikkrata gnang mikkang sigipa Jingjeni mikkang skang gita rongchingpilaha; indbibba Jalasingsa mandeska sningana ki-kom ki-kom chakskana nangengachim.

- Dimrimchi : Aioa, Abi Jingjeba. Bak mipal cha-rimjok chite ringrimjok inaonin, miksik tangbajolajjok peteng ching-bajolajjokai!
- Jingje : Anoba!. Ama appa sokkuja, mama ada krimkuja. Kam chu-sokgija da indinkua!
- Mirajing : Maina kenchakkua, Bochiba. Indinba adara nang-ninjok!
- Jingje : Na-song ka-sapaisa. Na-song dakchakpaisa. Chasong mingknainok. Mittelbijok, Sari, ne.
- Dimrimchi : Mitteloba mittelknep, niokoba sarikoba.
- Mirajing : O, na-a Sari. Ada seng-a dakanan anga kiracha-paengo. Kema ka-paibojokne, Bochia!

Jingje : O, Sariba. Angni gitchi nangkama indin ong·gramjaba.
Dikdik krat ong·oba angna kusini ong·piljok.

Dimrimchi : Na·songde da·ning! Redokra kagnok jakrimra
rim·griknok. Ang gitchipaara maiko man·skanoksai?

Jingje : Chasong gisik ra·ainok, Ano, ne. Ja·ku sanchakna inama,
biding sanchakna inema, anga gualjawane.

Dimrimchi : Kemane, Abine. Nang kusi ong·ako kalchi
soldapatmanjok. Nang gisik katchaako chi
rukimitmanjok.

Jingje : Aiao, Anoba! Indakede ong·jachim. Duga
skimatjokkon, kema.

Mirajing : Hai kusi ong·bojok! Jawa maiko chanchinok, mo
Sarisong!

Sal a·krong mimri, mat bolgong malango do·orang chitchat chichat
tuna bitip sanango, Jingje ma·gipa pagiparang jinma webaengako Nongal
chisamo nikwatsoaha.

Jingje : Wai, Na·ara. Ama appa sokbaengjok, mama ada
nabaengjok. Hai, gansre chinsresobojok, mo?

Jalasing miksijomjom a·chi bamgripe:

Jalasing : Him gose! Jang·nangjok ajongde, jokjajok Jalade!

Ka·ding mitchim mitchim agan wajo wajo:

Jingje : Aiao, maina sintipitchi maina ma·ringpitchi, Na·aba!

Ma·gipa demechikni mikkang rongchinge ka·dingsmite nisoengako
nike namen kusi ong·beaha aro demechikko chagipake ku·dimaha.
Jalasing jinggipani jamsrengon mikkang pa·na mikkrate napchipe
roengachim:

Rinjang : Boninga baosa? Ma bachi he·anga?

Jalama : An·tang seng·a dakeming mikkrata dakenggne he·ade
Maniba.

Rinjang : Aia, maina krata boningba. Dakbewalsa dakaia
ong·bewalsa ong·aiaba uara.

Kawakpa : Bao chawarisonga? Gimikna skang anga salam ka·chengna.

Miksi jomjom mikgron nichabregija Jalasing jamsrengoni ong·katbaengachim:

Sinje : Aia gumeba. Ban a·na napchipa dakkua. Hai, anga salamchengna.

Santopa : Jariko nipaibo! Mikgil dakgija, sokakosa sokbo inaijokko!

Kawakpa : Hai Chawrisonga! Angade nang·ko salam ka·na sikan man·chakjaengjokai.

Rinjang : Hai, Boning, salam. Nang ka·sachakpana mittelbijok Boninga.

Santoma : Hai, Ajonga, angaba salamna. Nampajok. Angaba depante man·daptaipajok. Namen kusi ong·bijokai angade.

Ua an·tam mahari dolgnina kusi ong·beani an·tam; saksa sakgipinko mittel mitchugrike, mitamrang kusini mikchi ga·akpile, an·tangtangni gisiko kusi ong·anikon parakna sappiltokjaengachim. An·tam simsim samsamo re·a ja·ku simango, songni nokni manderang Jalamani nokona pil·sa tom·kataiaha.

Sorapa : Da·asalde boning Jalapaba mikkang rongchingan dingdanga, namchik man·a ma·at ma·at, kotipba bokkalakon kaa dakjokai!

Jalapa : Ima, kusi ong·para na·aba Boningba. Depanteko ma·na nona on·na man·o kusi ong·jaoa grapboma?

Jalapani namprete boningtangna aganchakana mande jinma noko gapgipa ka·dinggrimaha.

.....

25. Dorsia:

Ma·apa sokkrimjok, mama ada tom·krimjok, mahari kusi ong·tokjok, bangki niamko chu·sokatnasanjokchim:

Sorapa : Song·a chakujanama, jila dal·kujanama, basakona sengkuna. Hai, kamko matchotsrangna, mo?

Jingjepa : Ho·e. Ama angno gimik chra mande gimik krimjok. Kusiba ong·tokengjok. Ia kusiniko hai, kamchi chu·sokatna, nang·chin Wanggipasong.

Sorapa : Ano Jingjea bao! Nang·ko sing·chengna!

Jingje : Inja, Awang!

Santoma : Da·asalde noko namchikko mittelpara gita, do·gita miksik tange peteng ching·e nikpajok. Mikkangba rongchingjok Jingjeba.

Jalama : Asolan he·ara, cha·gija ringgija duk ong·simsimesa an·tangko ong·siatade.

Sorapa : Ahem. Golpobaja·man mitteloba inchasa na·songa. Ano Jingje, Jalara nangming mipal engrimaijok chite ringrimaijok ine knarara bebema?

Jingje : (Ka·ding mitchim mitchim) Ho·e, Awang. Mipal palsan chite te·san, sim·paksan a·tipsan ong·aijok.

Sorapa : Indakode namjok ano. Nang rasong namenga. Anggri Jalasing bao?

Jalasing : Ia Mama.

Sorapa : Anggri, na·ara nang·jik Jingje aganako name knarikama? Uara kakket ong·ama?

Jalasing : (Jol·si mineng mineng chakate) Ong·a, Mama.

Sorapa : Namjok, Anggri, mitteljok. Da·aode na·song songa noka, ma·apa indakeming chra mande gimikba nachiltangtangchi knarikjok. Ang kamde matchotjok, ne.

- Jingjepa : Inchaba sako nichakkuna, hambinba sana nisengkuna. Appa Gachidrang Ama Angnodrang badine. Angade da·on namasaksak kamkoba injon chu·sokatna sikengachim?
- Rinjang : Ho·e. Ambi atchu jang·ke do·ga namnikpara ong·ode anga an·tangba ukoan chanchiengachim.
- Jalapa : Bebegita maiako ineming knalna sotnina inkuna, Anggriba.
- Sorapa : Ong·a, Boning, ong·ade. Indakoba da·sini ambi atchuni ja·rikbaenggipa ramako bachi dingtangatkuna. Kring nokgipa a·kim nokgipa namnikama namnikpaja sing·cheng sanchengnade ga·aka.
- Rinjang : Ho·e, Awang, unan. Mamade ba·rimatang badina. Noknokgipara manisa ambisa. Maniosa sing·pana nanggne.
- Jalama : Aia... Anggriba! Angde seng·a dakanan grina jongkurina anga kira cha·paengo. Bebegita ino chu·sokatoba sawa badindapnabai. Basakona dondamna mani. Na·song namnikengode da·on chu·sokataibo.
- Jingjema : Aia, Sariba. Maina ukoa agan janapengkua. Nang ka·sakuesa, adatangna ba·skangna ja·chongna, nang ka·sachakesa kam ong·para. Sari ka·sapaode mani namnikpaode da·alan namaignechim, ho·e!
- Jalama : Maiako ineming, Bochia! Adako kol·ok kol·ok he·ruraatana anga duk man·engjok. Noa namchiknaba jonga grinaba anga mikgil siengjok.
- Jingjepa : Maiko gro jedamkuna. Ra, Samepasongan, kamko chu·sokataibo.
- Rinjang : Aia bebe. Mama, na·an kamalde sana nichakdamkuna.
- Sorapa : Ho·e, Boning. Na·an kamal, da·ode nang kamsajokai.
- Samepa : Ahem. Noknokgipa namnikode na·song pakwatode, do·si do·doke on·natnara maina neng·niknasai angai. Depanteoba namchiktangoba, angade sing·na nangako sing·aigne. Ra, inchi he·batok sakgnian. Do·bisaba manggri nangiolnei.

Sinje do·bisa manggni – bipa gisik chotchrotbagipa aro bima sa·rong peteng ching·bamiting, koksepo de·bite ka·dingsmit Jingjeko niate chadengtimengachim. Jalasing unia Jingje sakgniko, nokjatchio am·pok ja·groo Jingjeko jakasi done asongataha. Jalasingde kratcha·ai on·chisaba nichajaengachim.

Samepa : Depante Jalasing. Na·ara, nang·ni jakasi done asongenggipa, nang·jik Jingjekoa, chasong sia sijana mipal tinpachina chite ko·pachina, angjik angde inean ra·engama?

Jalasing : (Nichagija) Ho·e ra·enga.

Samepa : Nang·jik Jingjeni sanamgija saoba, ding·namgija ding·oba, mikgitdokoba ja·koraoba, ja·bo nangoba, il·engna man·jaengoba, kompengna sapjaengoba, bachi galkuna angjik angdeanjok ine game rim·e aldu mittangnema?

Jalasing : Ho·e indakgine.

Samepa : De namjok. Name game rim·e cha·dilbo, Ajong, ne. Ra, Namchiktang Jingjea, nang jakrao nang·ming asongchapenggipa Jalasingkoara, chasong sia sijana, jama janggi tangaona, angse appa chane su·e song·e on·gnok, mipal tine chite ko·e on·gnok ine ku·chakengama?

Jingje : Ho·e ku·chakenga.

Samepa : Indakode na·ara, nang sea paani sananggija saoba ding·nanggija ding·oba, mikgitdokoba ja·koraoba, ri·bo do·kru nangoba lau tokko¹ oloba, angse appanjok bachi galkuna bachi watkuna ine mipal tinginema chite ko·gnema?

Jingje : Ho·e indakgine.

Samepa : Namjok ang namchik. Mikkangchi kusi ong·e nang·sena su·e song·e on·bo ne. Na·song gimikan knapajok, anga maikoba sing·changama?

Kawakpa : Grijokde, sing·na nangakode bon·e chon·e sing·rokrok sing·toktokjok da·ning!

- Kawakma : Itdinchachai bon·rokrok chon·rokrok dokroke chichie
sing·rokrok sing·toktokasa kamal tuara inpara da·ning,
mo, Abitang!
- Jingjema : Barakna, Ano. Depanteoba namchiktangoba minini
dakbewal, da·sinian sing·bewal sing·pana nangaijok.
- Me·apa : Ho·eai. Bebegitaba ma·na mikkratode nona engtojaode
kaman chu·sokjawa, mo Na·song?
- Sorapa : Intangba ambinba, jik se ra·a ingipade salsa sakgnina
daka ong·ja. Chasong sia sijana duk apot sokoba, okkri
cha·asioba, ja·kora mikgitdokba, ang jik angde ine uchi
angse appa ine chasongna janggi tangrimna jama
rakrima da·aloni ku·mikchatgrikatengako nikjama.
- Me·apa : Ho·e. An·chingara indakesa salario dongjangchio
songreo songgabato ina gita jawako nikoba gipinko
nioba ina gita jawana gisik on·gija gipinko silniktaigija
ia do·siani salko gisik ra·ai seba jikna dena chanchie
dakenga uchi jikba seko pako mande ra·na nangenga.
Unasa me·asani ma·apa uchi me·chikni ma·apa
indakeming chra angde gimik songni nokni mikkango
do·si do·dokpara da·ning!
- Samepa : (Do·bisa manggniko jako rim·bite) Poesrang,
poesrang....

Jalasingming Jingjeming chasong jikse ong·gne inode,

Janggi tangrimgine jama rakrimgine inode, a·ko game cha·dilne
inode, nokko rike rodilne inode, mia misi man·gine inode, kila ranga
man·gne inode; marang hajarsara starang tasiba, awa sagal nalsachi
awa songdu pil·sachi katangbo, dipomana jiljona gongmana til·tilna
katangboai he·angboai, matrasongsa Jalasingni skoo gaboai, na·rasongsa
uona sokboai, So Re...

Do·bisa manggniko gitdok aksote galataha. Manggnian sko gri
mangsa nokpaksachi aro manggipin nokpaksachi chokdo mokdo
biltiptipangaha. Noko duule asongenggipa manderangni ja·a ko·sak gita
biltiptipangaiachim. Apsan kole donata gita kope kal·ata gita, Jalasing
aro Jingjeni mikkango do·bisa manggnian apsan gangpong ganggopgrike
ja·si ja·binggrike sitokeachim.

Kawakpa : Indakesa nanggo! Chasongrimnagipade, jikse
ong·nagipakode do·oan pinniksoaiade. Asolan he·a
Jalasinga, jeanasa jemika dakaia.

Samepa : Da·mekune, anga do·bik nisirangna. Poesrang....
Jalasingming Jingjeming jama janggi tangrimne inode,
Do·bik namdokbokboai, do·bik namkudeboai,
Mirong rongdiksni gapboai, cha·ri janggisni ra·boai,
So Re....

Do·oni bikmako ratprue do·bikko bikongkate niaha:

Samepa : Aia, do·bikde nama namade! Maming marang
dingbrinade gri. Man·e cha·jaoba rike rojaoba
okgimude chakjawa, ku·gitchude rojawa. A·gilsakni
sabewal ding·bewal sabisina agride minggipin gri.
Mandeni rasongan mitdeni rasongkode japripa da·ning!
Na·a ang namchikko name gisik nange game rim·e
cha·dilaibo, Ajong, ne.

Songa noka an·sengjok, mahari dolgni katchajok, chu bitchi
kangrike wak kasi rasote, matchu dambe dokgake cha·mil
ringmiltokaha. An·tam walni jatengao, a·rong a·sak pang·sangsango,
Jalasing jiktang Jingjeko tuna re·dilangaha.

Ian A·chik dakbewal,
Chasong Manden rikbewal –
Ba·skangko nokchongna,
Gri sokchi nokkromna;
Chame kring kajok ma·kete,
Do·ko do·si do·doke!
Jani teng·a ronggrika,
A·rong a·sak pang·sanga,
Rinok rinok ka·tonga,
Chame ka·sagrikana!
Racha Sujon ganchengpa,
Rasong on·jok bisongna,
Noksam te·rik sokgitdola,

Jipjang bawang chroktima,
 Simtekagri bisong ka-sao,
 Chasong kring kaangao,
 Sane ja-kol ma-pan bidingko,
 Re-na chasong mikkango.
 An-tam balwa balsrisri,
 Rinok rinok ku-rangchi,
 Chasong janggi tangrimna,
 Kajok ka-tongko kringchi!

- Bon-aha -

